

EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA AMATA II

FEPUARI – IUNI

2024

VASEGA AMATA LUA - FA'ASOLOGA O MATAUPU
FEPUARI 04, 2024 – IUNI 30, 2024

<u>ASO/MASINA</u>	<u>MATAUPU</u>	<u>TUSI FAITAU</u>
1. Fepuari 04, 2024	FA'ATUPU LE AMIO ATUA – FA'AMAONI	Kenese 43:1-23
2. Fepuari 11, 2024	FA'ATUPU LE AMIO ATUA – AMIO MAMĀ	Salamo 119:9
3. Fepuari 18, 2024	FUA O LE AGAGA – UIGA E IVA O LE AGAGA PAIA	Kalatia 5:22-23
4. Fepuari 25, 2024	MATAUPU FA'AMANATU	
5. Mati 03, 2024	LAPATA'IGA MAI LE ATUA – MATAALA I LE MATAPE'APE'A	Salamo 119:36
6. Mati 10, 2024	LAPATA'IGA MAI LE ATUA – MATAALA I LE GALO O LE ATUA	Salamo 105:1
7. Mati 17, 2024	VAEGA O LE ESETA – FA'AMANATUGA MUAMUA	Ioane 13:1-5
8. Mati 24, 2024	VAEGA O LE ESETA – MALIU I LE SATAURO (LAUPAMA)	Mareko 15:24-25
9. Mati 31, 2024	VAEGA O LE ESETA – O LE TOETU (ASO SA ESETA)	Luka 24: 1-3
10. Aperila 07, 2024 4-7	ALOFA MONI – E ONOSA'I LE ALOFA	I Korinito 13:
11. Aperila 14, 2024	ALOFA MONI – E AGAMALU LE ALOFA	I Korinito 13: 4-7 (f5)
12. Aperila 21, 2024	ALOFA MONI – E FA'AMAGALO LE ALOFA	Korinito 13: 4-7 (f6)
13. Aperila 28, 2024	MATAUPU FA'AMANATU	
14. Me 05, 2024	VAVEGA A IESU – FA'AMALOLŌ LE TAGATA SUPA	Mareko 2:1-12
15. Me 12, 2024	O LE VI'IGA A SE TINĀ (ASO SA O TINĀ)	Fa'ataoto 31:28
16. Me 19, 2024	VAVEGA A IESU – FAGAINA LE LIMAGAAFE (PENETEKOSO)	Mareko 6: 37-44
17. Me 26, 2024	MATAUPU FA'AMANATU	
18. Iuni 02, 2024	VAVEGA A IESU – FA'AMALOLO LEPELA E TO'ASEFULU	Luka 17: 11-19
19. Iuni 09, 2024	VAVEGA A IESU – UA VAVAO E IESU LE MATAGI	Mareko 4:35-41
20. Iuni 16, 2024	Ō MA FA'APEA ONA FAI (ASO SA O TAMĀ)	Ioane 14: 15-16
21. Iuni 23, 2024	FILIPĪ – O LO'U UA IĀ KERISO LEA	Filipi 1: 21
Iuni 30, 2024	SU'EGA AFA MUAMUA O LE TAUSAGA – 2024	
	IA MANUIA GALUEGA O LENEI TAUSAGA	

ASO SA: FEPUARI 04, 2024
MATAUPU: “FA’ATUPU LE AMIO ATUA – FA’AMAONI”
TUSI FAITAU: Kenese 42:1-23
TAULOTO: Fa’ataoto 12:17a “O lē tautala fa’amaoni, ua fa’aali mai e ia le tonu...”

Sini: *Ia iloa e tamaiti o le fa’amaoni o se la’asaga tāua lea i le fa’amasani ma le fa’atupuina o le amio ma uiga fa’ale-Atua; e o’o ai lava i le tagata matua.*

FESOASOANI MO LE FAIAOGA:

Fa’atalofa atu i lau susuga i le amataga o lenei tausaga fou fa’alea’oa’oga. O la tatou Vaega Amata Lua lenei; o tamaiti ta’i 4-7 tausaga. Ua tau u’umi teisi lesona nai le Vasega Amata Muamua. Afai e to’alua oulua ma se tasi uso-a-faia’oga, e lelei ona amata e le isi faia’oga le fa’afeiloa’i o tamaiti a’o gasolo atu. O i’ina fo’i e maka ai loa le tauvala’auga ma tusi lana sene. E lāvea uma ai mea na i le taimi e tasi, ma fa’asao ai le taimi. Ae saga’i le isi faia’oga i ni nai pesepesega e fa’aala ai pe fa’aoso ai fo’i le lagona fiafia i le a’oga i lenei taeao. E lelei le filifili o ni pese e feso’ota’i ma le lesona, ina ia saga fa’amautu ai le tala ma le a’oa’oga o le a fa’alogo i ai. Nisi tusi fa’aopoopo e fesoasoani i lau su’esu’ega: Kenese 42:29 - 43:23, Levitiko 19:35-36, Fa’ataoto 16:11-13.

E maualuga le fa’amoemoe ua lava sauni lau Susuga, e lē tau va’ai ai i le Tusi ma fa’amatala le lesona. E toto’a ai la’u va’ai i lau vasega, ma avanoa lima mo nisi tāga po’o ni fa’ata’ita’iga e fia fai. O nai faa-manatu lava, ae talitonu ua nofofale i finagalo tapenaga mo le galuega. Manuia le galuega i lenei aso.

FESOASOANI MO LE MATAUPU:

1. Fai sina tala (**ice breaker**) pei se fa’atafīti e fa’aoso ai le lesona, pei o lena e tusi atu i lalo.
2. Faitau atoa e lau Susuga le tala i mataupu e lua (Kenese 42 & 43), e faigofie ai ona e fa’apu’upu’uina le tala. Fa’amamafa le vaega lea na maua ai tupe ua toe fa’afo’i ane i a latou taga, ma le tonu e fa’afo’i tupe na pe a toe o i Aikupito e fa’atau mea ‘ai.
3. Fa’amatala le uiga o le upu **Fa’amaoni**.
4. Ia iloa e tamaiti sa mafai ona tu’u e uso o Iosefa tupe muamua na maua i a latou taga, ae le’i fa’apena. O uiga fa’aalia na o le fa’amaoni. Fa’afo’i meatotino a isi, e lē o ni au mea.
5. Manatua le vaega a lo latou tamā o Iakopo na fai atu ia ave ni meaalofa ma le tagata i Aikupito, ma toe ave uma tupe na maua i a latou taga, fa’ataasi ma nisi tupe fou e toe fa’atau mai ai nisi saito.
6. Na manatu o se sesē na toe aumai ai tupe i a latou taga. Ae ina ua taunu’u i Aikupito, na iloa ai e le o se sesē, o le mea na fuafuaina. Ana le toe fa’afo’ia tupe na i taga, atonu o le a manatu tagata Aikupito na latou feagai, o ni tagata lē fa’amaoni i latou. O le mea lelei na latou faia, ma ua atili ai ona alofagia i latou e tagata Aikupito, aemaise lo latou uso o Iosefa.
7. E lelei pe a tusi matatetele le upu FA’AMAONI i se pepa malō (cardboard) pe afai e leai se laupapa.
8. Faitau so’o le Tauloto, a lē maua, ae ua masani ai le fa’alogo. Tofi se isi e tatalo e fa’atu’ua ai.

FESILI:

- Aiseā na o ai uso o Iosefa i Aikupito? (*Fa’atau saito/mea ‘ai, ina ua tetele le oge i lo latou nu’u*)
- O ā mea na maua i gutu o taga saito a le ‘au uso? (*Tupe*)
- O le a le tonu na fai e latou ma le latou tamā i le mea e fai i tupe ia i taga? (*Toe fa’afo’i*)

- Ta’u mai se isi upu e tutusa ma le Fa’amaoni? (*Lē pepelo, Lē ave fua mea a isi, Fai lelei feau, Lē kopi*)

PESE: “*E fa’amaoni, e fa’amaoni le Atua*” (fati: “E lelei, e lelei, e lelei tele le Atua)

Fa’atafiti (Icebreaker): E iai se isi o outou na alu i se aso e fa’atau, ae sesē lana sui na avane e le fa’atauoloo? Ua sili mai le tupe i le mea e tatau ona iai? O le a lau mea na fai i le tupe na ova mai? Toe fa’afo’i pe tu’u pea ma oe? (Fa’atali ni tali). E fa’apena le mea na tupu i le tatou lesona o le aso lenei. Fa’alogo fa’alelei tamaiti.

Ia manuia lenei Aso Sa

ASO SA: FEPUARI 11, 2024
MATAUPU: “FA’ATUPU LE AMIO ATUA – AMIO MAMĀ”
TUSI FAITAU: Salamo 119: 9-16
TAULOTO: Mataio 5:8

Sini: *Ia malamalama tamaiti e maua le ola mamā e ala i le faitau le Tusi Paia i aso uma ma usita’i i a’oa’oga a Iesu o lo’o i ai.*

FESOASOANI MO LE FAIAOGA:

Mālo le soifua. Afai o iai sou soa-a-faia’oga, e lelei fo’i ona toe fa’auau a lua matāfaioi amata pei o le **Aso Sa ua te’a:** fa’afeiloa’i, maka le tauvala’auga, ma tusi sene e le isi faia’oga, ae sauni loa le isi faia faia’oga i ni pesepesega ma le tatalo amata, soso’o ai lava ma le Lesona. Nisi tusi e fa’alautele ai lau sauniuniga. Salamo 19:7-9, Salamo 24:3-4. Va’ai le Galuega Fa’atino o lo’o i lalo e mua’i tapena ae le’i faia le vasega.

FESOASOANI MO LE MATAUPU:

1. Faitau le Salamo 119:9-16. Fai i tamaiti e fa’alogo lelei, ae toe faitau le fuaiupu 9.
2. O ai se isi e iloa le uiga o le upu mamā? (tu’u le avanoa pe iai se isi e tali mai).
 A mamā se mea, o lona uiga e lē palapalā pe eleelea. E iai se isi e mafai ona fa’aali mai se mea mamā o o lo’o va’ai atu nei i ai? (tu’u le avanoa e tali mai ai. A leai, fa’auau).

Tali: O lo’u ofu pa’epa’e. O o’u lima. O le falesa. etc. etc.

Ioe, e faigofie ona fa’amamā mea na auā e mafai ona tatā le ofu, fufulu ou lima, pe salu le fale ma iloa atu ai ua mamā. A palapalā le tou ta’avale, e mafai ona fufulu ina ia mamā.

E tumu le lalolagi lenei tatou te nonofo ai i mea palapalā ma le lē mamā. E o’o fo’i i amio a tagata. A e tago ave fua se mea a se isi, po’o se peni, se meata’alo, pe fa’aleaga fua se meatotino a se isi, ua sesē ai oe ma ta’ua o le agasala. O le agasala, o le aga po’o se amio ua lē sa’o, pe lē mamā fo’i. E fa’afefea la ona fufulu pe fa’amamā se amio a se isi ua sesē pe lē mamā?

Toe faitau le Salamo 119 f. 9-11. E mafai ona fa’amamā lau amio, pe a faitau le Tusi Paia i aso uma, ma fa’aa’oa’o i mea o lo’o fa’atonuina mai, ma tausi i poloa’iga a le Atua o lo’o i ai. Fai mai le fuaiupu e 10, “e sa’ili i le Atua ma le loto atoa, ‘aua ne’i sesē ia ana poloa’iga po’o fa’atonuga.” Afai ua e iloa ua iai sau amio ua sesē pe lē mamā, ona e talanoa lea i le Atua e fa’amamā mai lou loto na mafua ai lau amio sesē. O le uiga lena o le fa’atupu o le amio Atua ma fa’amamā a tatou amio. Na’o le Atua e mafai ona fa’amamāina tatou, pe afai ua sesē a tatou amio. A’o tatou e faitau le Tusi Paia ma taumafai e ola pei ona fa’asino mai e Iesu. E lē o aso uma e sa’o ai a tatou amio ma mamā, auā e tele tagata ma isi

mea eleelea i le lalolagi lea tatou te ola ai, e tosina atu ai fo'i tatou. Ae o le taimi lava e te iloa ua sesē ai ma lē mamā lau amio, **tatalo** loa pe **talanoa** i le Atua e fa'amamā mai lau amio.

GALUEGA FA'ATINO: Tusi le ulutala i se pepa fa'amatatetele, ma fa'apipi'i i se mea e iloa atu ai e tamaiti. Ia tusi tetele fo'i mata'itusi o le AMIO MAMĀ i ni pepa malō (atigi pusa). Ona tipi ta'itasi lea o mata'itusi, ae tu'u fa'atasi i luga o se laulau i luma o le vasega. A uma le tala, ona o ane lea o tamaiti e tofu ma le mata'itusi ae taumafai e tu'ufa'asolo e sapela ai le upu Amio Mamā. Tu'u ni fasi tape i tua o mata'itusi e mafai ai ona pipi'i i luga o le puipui o le potu, po'o se isi mafolafola e iloa atu ai e tamaiti. O le 'auga, ia fa'amasani le va'ai a tamaiti i le upu ma mau ai i o latou loto i lenei vaiaso.

FESILI: .

- E iai se upu e te manatua mai le fuaiupu lea na tatou faitauina i le amataga? (*Ae a le fa'amamāina?*)
- E fa'afelea ona teu le afioga a le Atua i lou loto lea e fai mai ai le f.11? (*Tauloto*)
- E fa'afelea ona iloa e se isi tulafono ma afioga a le Atua? (*Faitau le Tusi Paia*).

PESE: "Fa'amamā mai lo'u agaga" (fati o le *Ufiufi lo'u agaga*.)

ASO SA: **FEPUARI 18, 2024**
MATAUPU: **"FUA O LE AGAGA – UIGA E IVA O LE AGAGA PAIA"**
TUSI FAITAU: **Kalatia 5:22-23**
TAULOTO: **Ioane 15:8** "*E vi'ia lo'u Tamā i lenei mea, pe a outou fua tele mai...*"

Sini: Ia iloa e tamaiti e iva fua o le Agaga Paia e mana'o tatou te maua.

FESOASOANI MO LE FAIAOGA:

Fa'aauau pea tofiga ma lou uso-a-faia'oga mo le amataina o le vasega. E lelei fo'i ona tapena ane i luma e le faia'oga lea ata po'o fuāla'au 'aina e fai ai le Galuega Fa'atino. Ae gafa le isi faia'oga ma le fa'amatalaina o le lesona. Nisi tusi fesoasoani: Luka 6:43-45, Mataio 7: 16-23, Fa'ataoto 4:23

FESOASOANI MO LE MATAUPU:

Ua tā'ua o tatou uiga ma amio o tatou fua. A lelei ma matagofie uiga e aliali mai ia te oe, e mafai ona fa'apea tagata, o oe se tama po'o se teine lelei. A lē lelei pe lē manaia ou uiga ma au mea e fai, e fa'apea tagata – o se tama po'o se teine leaga. E fa'alagolago le fa'aigoa o tatou e isi, i fua e aliali i a tatou.amio.

I fuaiupu na tatou faitauina mai le Kalatia 5:22-23, o lo'o ta'u mai ai amio po'o "fua o le Agaga". E iva uiga na: ¹Alofa, ²Olioli, ³Filemu, ⁴Onosa'i, ⁵Mataalofa, ⁶Agalelei, ⁷Fa'amaoni, ⁸Agamalū, ma le ⁹Amio Mamā. I le lesona o le asō, o le a tatou a'oa'oina ai le eseese tele o le lelei ma le leaga. E foliga eseese, e uiga eseese, e eseese fo'i upu ma tala e sau ai. O tagata e fua lelei pe lelei a latou amio, e savavali i le ta'ita'iga a le Agaga o le Atua, o lo'o musumusua i latou i mea e fai; e aliali mai ai fo'i **fua o le Agaga**. A'o ē aliali mai ai fua lē lelei pe leaga, o latou na e ta'ita'iina e lagona fa'aletagata e lē o iai le Agaga o le Atua. E mafai ona e talanoa i le Agaga o le Atua e afio mai i lou loto, na te pulea lau amio, ona aliali mai ai lea o "fua o le Agaga" i lau amio. E te lē tau fa'atali se'i tatalo se faifeau po'o ou

mātua mo oe, ina ia e maua fua o le Agaga; e te talanoa lava oe i le Agaga o le Atua, auā na te lagona mai oe, o lo’o fa’afofoga mai fo’i ma fa’atalitali i taimi tatou te talanoa atu ai iā te Ia.

GALUEGA FA’ATINO:

O tatou uiga ma amio e ta’ua o “fua”. A lelei ma tausa’afia, ua fiafia i ai tagata, pe ta’ua o se tama po’o se teine lelei; o lona uiga ua iā te oe ni fua lelei. Avane ni ata (po’o ni fruits mo’i) o fuāla’au ‘aina eseese ma tufa e tofu le tamaitiiti ma lana fuāla’au ‘aina. Ia aofia ai ni fuāla’au pala, pei o se fa’i otā ua matuā pala e le mafai ona ‘ai. Fa’asolo le fesili pe ā mai lana fuāla’au ‘aina (tusa pe na’o se ata).

FESILI:

- E fia fua o le Agaga? Ta’u mai. (*E iva. Alofa, Olioli, Filemu, Onosa’i, Mataalofa, Agalelei, Fa’amaoni, Agamalū, ma le Amio Mamā*)
- E fa’afefea ona tatou aloese mai le ta’ita’iga a lagona fa’aletagata? (*Pe a tatou savavali i le Agaga*)
- O ā ni fua o le Agaga e foliga faigofie ia te oe ona maua? (*Tu’u le avanoa e tali mai ai*).

A’OA’OGA:

Fai mai le Tusi Paia, “E leai se la’au lelei e fua mai i fua leaga; e leai fo’i se la’au leaga e fua mai i fua lelei. Auā o la’au ta’itasi ma lona lava fua e iloa ai; auā e lē tau e tagata fua o le mati i la’au tuitui, latou te le tau fo’i se fuifui vine i le la’au talatala. Ua aumai mea lelei e le tagata amio lelei i mea lelei ua teu i lona loto; o le tagata amio leaga fo’i ua aumai e ia mea leaga i mea leaga ua teu i lona loto; auā o le tele o mea i le loto e tautala mai ai lona gutu”. Tatou mafaufau i mea o lo’o teu i o tatou loto. Afai o le ita ma le fia tau ma sui, o ituaiga upu fo’i na tatou te tautatala ai. Mafaufau nei ma tu’u i le Ali’i – O ā mea o lo’o teu i lou loto?

PESE: A o Fua o le Agaga, e muamua le **Alofa,**
Olioli, Onosa’i, ma le **Amio e Mamā.**
O le **Mataalofa,** ma le **Agalelei,**
Fa’amaoni, Agamalū, ma le **Filemū.**

Manuia lenei Aso Sa

ASO SA: FEPUARI 25, 2024
MATAUPU: MATAUPU FA’AMANATU - LESONA 1,2,3:

1. FA’ATUPU LE AMIO ATUA – FA’AMAONI

Tauloto: Fa’ataoto 12:17: *O lē tautala fa’amaoni, ua fa’aali mai e ia le tonu...*

A’ano o le Mataupu: Ia iloa e tamaiti o le fa’amaoni o se la’asaga tāua lea i le fa’amasani ma le fa’atupuina o le amio ma uiga fa’ale-Atua; e o’o ai lava i le tagata matua. Manatua le mea na fai e uso o Iosefa i tupe na toe maua i gutu o a latou taga? Ioe, sa toe fa’afoti! O le amio fa’amaoni lena. O se uiga fa’ale-Atua fo’i lena. A e fa’ata’ita’i ona fai so’o amio fa’apena, e o’o ina e matua ua e masani ai.

- Fesili:**
- Aiseā na o ai uso o Iosefa i Aikupito? (*Fa’atau saito/mea ‘ai, ina ua tetele le oge*).
 - O ā mea na maua i gutu o taga saito a le ‘au uso? (*Tupe*)
 - O le a le tonu na fai e latou ma le latou tamā i le mea e fai i tupe ia i taga? (*Toe fa’afoti*)
 - Ta’u mai se isi upu e tutusa ma le Fa’amaoni? (*Lē pepelo, Lē ave fua mea a isi, Fai lelei feau, Lē kopi*)

2) FA'ATUPU LE AMIO ATUA – AMIO MAMĀ

Tauloto: Mataio 5:8: “*Amuia ē loto mamā, auā latou te iloa atu le Atua.*”

A'ano o le Mataupu: E tupu le Amio Atua ma le Amio Mamā pe a toaga e faitau le Tusi Paia i aso uma, ma fa'aa'oa'o i amio o lo'o ta'u mai ai. A sesē po ua lē mamā sau aga po'o sau amio, o lona uiga ua e agasala. E tatau ona fa'amamā. E mafai ona toe fa'amamā pe a e tatalo pe talanoa iā Iesu e fa'amamā mai lau agasala.

Fesili: • E iai se upu e te manatua mai le fuaiupu lea na tatou faitauina i le amataga?

(*Ae a le fa'amamāina?*)

• E fa'afefea ona teu le afioga a le Atua i lou loto lea e fai mai ai le f.11? (**Tauloto**)

• E fa'afefea ona iloa e se isi tulafono ma afioga a le Atua? (**Faitau le Tusi Paia**).

3) FUA O LE AGAGA – UIGA E IVA O LE AGAGA PAIA

Tauloto: Ioane 15:8 “*E vi'ia lo'u Tamā i lenei mea, pe a outou fua tele mai...*”

A'ano o le Mataupu: E iva uiga ua ta'ua o “Fua o le Agaga”: ¹**Alofa**, ²**Olioli**, ³**Filemu**, ⁴**Onosa'i**, ⁵**Mataalofa**, ⁶**Agalelei**, ⁷**Fa'amaoni**, ⁸**Agamalū**, ma le ⁹**Amio Mamā**. Ua a'oa'oina i le lesona lenei le eseesega tele o le lelei ma le leaga. E foliga eseesee, e uiga eseesee, e eseesee fo'i upu ma tala e sau ai. O tagata e fua lelei pe lelei a latou amio, e savavali i le ta'ita'iga a le Agaga o le Atua, o lo'o musumusuina i latou i mea e fai; e aliali mai ai fo'i **fua o le Agaga**. A'o ē aliali mai ai fua lē lelei pe leaga, o latou na e ta'ita'iina e lagona fa'aletagata e lē o iai le Agaga o le Atua.

Fesili:

• E fia fua o le Agaga? Ta'u mai. (*E iva. Alofa, Olioli, Filemu, Onosa'i, Mataalofa, Agalelei, Fa'amaoni, Agamalū, ma le Amio Mamā*)

• E fa'afefea ona tatou aloese mai le ta'ita'iga a lagona fa'aletagata? (*Pe a tatou savavali i le Agaga o le Atua*)

• O ā ni fua o le Agaga e foliga faigofie ia te oe ona maua? (*Tu'u le avanoa e tali mai ai*).

Ia manuia lenei Aso Sa

ASO SA: MATI 03, 2024

MATAUPU: “LAPATA'IGA MAI LE ATUA – MATAALA I LE MATAPE'APE'A”

TUSI FAITAU: Mataio 26:14-16

TAULOTO: Luka 12:15 “*Ua fetalai atu fo'i o ia iā te i latou, Ia outou, ia leoleo outou ia te outou auā le matape'ape'a...*”

Sini: *A mae'a lenei lesona, o le a malamalama tamaiti i le leaga o le matape'ape'a ma le fa'aleagaina ai lo tatou ola auauna i le Atua.*

FESOASOANI MO LE FAIAOGA:

O le matape'ape'a, o le mana'o tele. O le loto e lē fa'amalieina i mea ua ia te oe, ae mana'o pea ia saga faula'i mai mea; aemaise lava le 'oa. E lelei le faitau atoa le Mataio 19:16-22, (fa'apu'upu'u i tamaiti) le tigā o le taule'ale'a mau'oa ina ua fai atu e fa'atau ma tufatufa ana mea i ē matitiva; auā e tele naunau ana oloa. Nisi tusi e fesoasoani: Salamo 119:36, Mataio 27:1-5, Luka 6:38.

FESOASOANI MO LE MATAUPU:

O le matape'ape'a e mafai ona aveeseina ai lo tatou fiafia, ma punitia ai avanoa e fa'aaogāina ai tatou e le Atua. O le matape'ape'a e uso ma le limamau, 'ai'ū, lē fia foa'i; auā e mana'o e fa'aputu pea ia atili tele ana mea. E lē maua fo'i sona filemu, auā e mua ona mafaufau i ala e saga fa'atele ai ana mea, ma ala e puipui ai ne'i mamulu atu i nisi, a ia tau o ia lava. O le matuā manatu fa'apito lava.

O le matape'ape'a o Iuta le Sekara na ia fa'alaina ai le Ali'i o Iesu mo tupe e 30. Ae le'i aogā na tupe iā te ia, auā e uma ane ua salamō i lana mea na fai. Ona alu lea noa lona ua. Leai se fiafia na maua mai ai.

E iai le fa'ataoto a le Ali'i i le Mau'oa Valea. Ua tele naunau ana oloa, ua lē ofi ona fale e teu ai oloa. Ona fa'apea lea o lona manatu, o le a talepe ona faleteuoloo, ae toe fau nisi fale tetele. Ona tu'u uma lea iai ana oloa, ona nofonofu loa lea na ona 'ai ma inu ma fiafia i ana oloa ua tele. Ae fetalai mai iai le Atua, "Le vale e. E a'amiina atu lou agaga i le po nanei, ae fai ma ai mea na ua e saunia?" E fa'apena le tagata e fa'aputu 'oa ia te ia, ae lē mau'oa i le Atua. O le tagata matape'ape'a lena. O le lapata'iga mai le Atua: Ia mataala ne'i maua tatou i le matape'ape'a. E leai se mea lelei e maua ai.

GAOIOIGA FA'ATINO:

Fa'amalamalama i tamaiti le uiga o le **sefulua'i** o lo'o ta'u mai i le Tusi Paia. O le vaega lena a le Atua i mea uma e te maua, aemaise lava tupe. E muamua aveese mai lou totogi po'o so'o se tupe maua, ona fa'ato'ā fa'asoa ai lea i au pili. A fa'amalosia fa'apena i aso totogi uma, e i'u ina e masani e tu'u ese le vaega o le Atua mai lau 'oa, ma e masani ai i le ola foa'i. Ia toleni le mafaufau ma le loto, o taimi uma e maua ai au tupe, e muamua tu'u ese le vaega a le Atua. O lau taulaga lena ma tupe e foa'i i le lotu, etc.

FESILI:

- E fia tupe na fa'alata ai e Iuta le Ali'i? *(30 tupe siliva)*
- Na fiafia Iuta i ana tupe na maua? *(Leai. Na i'u ina alu sisi lona ua).*
- O le ā le fuafuaga a le Mau'oa Valea? *(Talepe ona faleteuoloo, ae toe fai ia tetele; ona nofonofu lea e 'ai ma inu, ma fiafia i lona olaga atoa, i ana mea e tele.)*
- Na taunu'u le fuafuaga a le Mau'oa Valea? *(LEAI. Fetalai mai le Atua, A a'ami atu lou agaga nanei, e fai ma ai mea na ua e saunia? Auā e lē pule i lona ola.)*

A'OA'OGA:

E leai se fiafia e maua i le matape'ape'a. A tele au oloa, e na'o le saisaitia o ou lagona ma lē maua se filemu i le popole ne'i gaioia, pe mamulu atu i se isi auala, pe i'u ina uma. Na'o le 'oa e alu iai le mafaufau, ae leai se taimi mo le Atua. Ae a foa'i atu, e toe foa'iina mai i lou lava 'ie pulupulu le fua lelei, e lolomi ma lulūina, e tumu ma solo i tua. Auā o le fua e te fuaina atu, e toe fuaina mai ai iā te oe. E sili le manuia o lē foa'i i lo lē na te talia.

PESE: "Ua na'o oe o lo'u mana'o" - "You Are All I Need."

ASO SA: MATI 10, 2024
MATAUPU: "LAPATA'IGA MAI LE ATUA – MATAALA I LE GALO O LE ATUA"
TUSI FAITAU: Salamo 105:1
TAULOTO: Teuteronome. 8:11 *Ia oe, ne'i galo ia te oe o le ALII lou Atua, i lou lē tausii i ana poloa'iga.*

Sini: Ia malamalama tamaiti e faigofie ona galo le Atua pe a solo lelei ma manuia le olaga. Ia mataala 'aua ne'i tupu le mea lena i o latou olaga.

FESOASOANI MO LE FAIAOGA:

E o fa'atasi le 'aua ne'i galo, ma le vivi'i i le Atua. E vivi'i ma fa'afetaia le Atua na avatua manuia. Va'ai i le Gaoioiga Fa'atino, a mae'a le Fa'amatalaga o le Lesona/Mataupu, fai loa le avanoa e se tasi o faia'oga e fa'asolo ai le fesili i tamaiti: **O le a se mea e te fia fa'afetai ai ma vivi'i i le Atua?** Afai na tusi i lalo ana tali, ave i ai le avanoa e faitau mai ai lana pepa. A leai, ave i ai le avanoa e tautala mai ai i se mea na te manatua. Nisi tusi fa'aopoopo: Teuteronome 8:10-20, Salamo 24, Salamo 92:4-6, Fa'aaliga 4:11,

FESOASOANI MO LE MATAUPU:

O le lapata'iga po'o le fa'amanatu mai le Atua i lona nu'u. A outou o'o i le nu'u lelei ua fa'asinoina mo outou; 'aua ne'i galo le Atua na avatua le nu'u lelei lena ma fa'amanuiaga uma o iai.

Na matua fetalai tu'u sa'o le Atua ia Isaraelu i le tusi o Teuteronome, e **'aua ne'i galo le Atua'**, aemaise pe a manuia. Fai mai, "a outou a'ai ma mao'ona, ma faia fale lelei ma fa'ateleina tou lafu manu, auro ma ario, **'aua ne'i galo'** le Atua. O le ala lea na fai ai le tele o tausamiga a le Lotu Iutaia i tausaga ta'itasi, ina ia fa'amalosia ai tagata e fai sauniga fa'amanatu ia – ina ia **'aua ne'i galo'** le tele o taimi na lavea'iina ai latou e le Atua: O le fia a'ai ma le fia feinu i le vao, o fa'ama'i, o taua, ma le umi o le ala. E tele atunu'u ma augatupu ma auga-tupulaga e le fa'amamafaina le fa'amanatu o tulaga fa'apea, ona fai lea ma ala e galo ai. O atunu'u lava e fa'agalo le Atua, o atunu'u fo'i na ua soloiese o latou ma'lo ma le lalolagi. Na ona ta'u i tala fa'amaumau, a ua le toe tula'i mai i se malosi pei ona iai.

E le gata ina manatua, a ia usita'i i poloa'iga uma na fai atu ai le Ali'i le Atua ia te i latou. Ia mataala ma ua'i mafaufau i le Atua, ina ne'i faifai ma'lie mai le sau o le tiapolo e aumai le **galo** i o outou loto.

GAOIOIGA FA'ATINO:

Tofu le tamaititi ma le pepa ma le peni, e tusi i lalo ni **mafuaga e fia vivi'i ai i le Atua**. A vivi'i ma fa'afetai, ma ta'u le mea e mafua ai le agaga fa'afetai, o lona uiga o le a le galo. A le ilo tusitusi, ona fesili lea i ia, ma fai i ai e manatua pe a o'o atu ia te ia le fa'asologa o le fesili.

Ia fa'amalosi'au ma fa'atupu fiafia i o latou loto le ola i le agaga fa'afetai. A amata atu nei, e o'o ina matutua ua fai ma masani.

FESILI:

- O le a le mea e fai e tagata Isaraelu pe a a'ai ma mao'ona? (*Vivi'i i le Atua ma 'aua ne'i galo o Ia*)
- Aisea na mana'o ai le Atua e 'aua ne'i fa'agalo Ia e Isaraelu? (*Ne'i mitamitavale ma fa'amaualuluga*)
- O ai e maua mai ai le malosi e maua ai oloa? (*O le Atua*)
- O le a le mea e tupu i atunu'u e fa'agalo le Atua? (*Ua fa'ato'ilalo ma soloiese ma le lalolagi*)

A'OA'OGA:

E faigofie ona manatu le tagata o lona lava potu ma lona malosi ua na maua ai fale, ta'avale, tupe ma le tamaoaiga; auā o ia lea e usu e faigaluega. A'o le tagata potu e vivi'i i le Ali'i ma fa'apea ifo: "Ou te alaga fiafia ona o mea ua faia e ou a'ao. E matua sili lava mea ua e faia, e loloto lava ou manatu. O le tagata valea na te le ilo, ma le vale na te le lagona lenei mea. O le lalolagi ma mea ua tumu ai, o ā le ALI'I ia. Le Ali'i e, e tatau lava Oe ina tu'uina atu ia te Oe le vi'iga, ma le fa'ane'ene'ega, ma le mana; auā na e faia mea uma lava, o lou finagalo fo'i e iai i latou uma ma ua faia." A fa'afefea la ona galo ia i tatou le Atua?

PESE #83 f. 1&2

1. *Vivi'i atu ia i lo tatou Ali'i*

2. *Ne'i galo i tagata, e ua ola ai*

ASO SA: MATI 17, 2024
MATAUPU: “VAEGA O LE ESETA – FA’AMANATUGA MUAMUA”
TUSI FAITAU: Ioane 13:1-5
TAULOTO: Ioane 13:15 “*Auā ua ou avatu le fa’aa’oa’o ia te outou.. ia fa’apea lava e outou ona fai.*”
Sini: *O le a iloa e tamaiti le tāua o le Tausamiga o le Paseka, ma Iesu le tama’i mamoe sili o le Paseka na fasia mo lo tatou fa’aolataga.*

FESOASOANI MO LE FAIAOGA:

Tusi tetele upu nei i le laupapa po’o se cardboard telē: **O Ā NI MEA TATOU TE FA’AMANATUINA?** Ia sauni ipu mo le fa’amanatuga, ma se areto ma se ipu inu. Ia sauni se apavai ma se solo.

FESOASOANI MO LE MATAUPU:

Fa’amatala le Ulua’i Fa’amanatuga: Mataio 26:17-30 ma le Ioane 13:1-17. O le afiafi muamua o Areto e lē Fa’afefeteina, na fai ai fo’i le ‘aiga (paseka) a Iesu ma ona so’o. A’o a’ai i latou, na fa’apea atu Iesu, “*Ou te fai atu ia te outou, e fa’alataina a’u e se isi o outou.*” Ua tau fai fesili i latou iā Iesu, “Le Ali’i e, o a’u ea?” Ae tali Iesu: “*O le tagata e fufui fa’atasi o ma lima i le tanoa*”. E fesili atu Iuta le Sekara po’o ia, ae tali mai Iesu, “**O lea lava**”.

A’o latou a’ai, ae tago Iesu i le areto, ua fa’afetai, ona tofitofi lea ma avatu i ona so’o, ua fa’apea atu, “*Inā tago ia inā a’ai; o lo’u tino lenei.*” Ua tago fo’i i le ipu, ua fa’afetai, ona avatu ai lea e Ia iā te i latou, ua fa’apea atu: “*Inā inu ia outou uma i ai; auā o lo’u toto lenei, o le toto o le feagaiga ua fa’amaligiina mo tagata e to’atele e fa’amagalo a’i agasala.*”

A’o fai le talisuaga, ona tu lea o Iesu i luga, ua tago i le apa vai ma le ‘ie solo, ma fusi ia te ia. Ona liligi lea o le vai i le apa, ma fa’asolo ona mulumulu vae o ona so’o. Ua tete’e Simona ma fai mai, “*le Ali’i e, e te lē mulumulu lava o’u vae e o’o i le fa’avavau.*” Ae tali atu Iesu: “*Afai ou te lē mulumulu ou vae, e leai sou tofi fa’atasi ma a’u.*” Ua fetalai atu o Ia i ona so’o: “*...Ua ou mulumuluina o outou vae, ia outou femulumulua’i o outou vae. Ua ou avatu ia te outou le fa’aa’oa’o, e pei ona ou faia ia te outou, ia fa’apea lava e outou ona fai.*”

GALUEGA FA’ATINO:

E fa’aali atu e le faia’oga le areto pe a o’o i ai le fa’amatalaga, fa’apea le ipu uaina. E tofitofi ma tu’u atu i se isi ua fai ma so’o. E tago fo’i i le apavai ma se solo, ma alu ane se tamaitiiti e nofo i ona luma, ae fa’aa’oa’o le mulumuluga vae. Fa’atonu tamaiti e talai o latou se’evae ma ta’u iai le tu fa’a-lutaia pe a ulufale. Ona sau lea o le auaua ma le apavai ma le solo e fufulu vae o ē ulufale atu, ae le’i taoto e a’ai.

FESILI:

- Aiseā na fufulu ai vae o tagata pe a ulufale i aso o Iesu? (*Ona e palapalā i le pefu o le auala*)
- O le a le Paseka sa fa’amanatu e tagata i aso o Iesu? (*Le po na sopoia ai fale o Isaraelu e le agelu o le oti i Aikupito, ina ua uma ona vali pou o latou fale i le toto*)
- Aiseā na ta’u ai Iesu o le Tama’i Mamoe a le Atua? (*Ona sa maligi lona toto e togiola ai tatou*).

A’OA’OGA:

Ina ua fa’ato’ā va’ai Ioane le Papatiso iā Iesu, fai mai a ia: “Fa’auta i le Tama’i Mamoe a le Atua na te aveeseina agasala a le lalolagi. E fa’atusa fa’apena le tama’i mamoe na fasia i Aikupito, ae avane lona toto e vali ai faitoto’a o fale o Isaraelu, ina ia sopo loa ai le agelu o le oti, ae fa’asao latou. O le ulua’i fa’amanatuga na fai e Iesu ma ona so’o, na Ia fa’aailoa atu ai iā i latou le uiga moni o le osiga o le taulaga i le tama’i mamoe. Na silafia e Iesu ua lata ona o’o mai le taimi e fasia lona tino ma fa’asatauroina, ma o le a fa’amaligiina lona toto e togiola ai tagata e to’atele. So’o se tasi e talitonu ma fa’atuatua ia te Ia, e fa’aolaina ia. Po’o fea lava e te ‘ai ai i le Fa’amanatuga, ia e manatua le mea tāua lena.

PESE: # 360 “Iesu e, o lou toto.”

ASO SA: MATI 24, 2024
MATAUPU: “VAEGA O LE ESETA – MALIU I LE SATAURO (LAUPAMA)”
TUSI FAITAU: Mareko 15: 24-25

TAULOTO: Filipi 2:8 “...*Ua fa’amaulalo o ia e ia lava, ua na anaana ua o’o ina maliu, o le maliu lava lea i le satauro.*”

Sini: *Ia malamalama tamaiti i le fa’asatauroina ma le uiga o le maliu o Iesu i luga o le satauro.*

FESOASOANI MO LE FAIAOGA:

Tusi le fuaiupu Isaia 53:6 i le laupapa, po’o se pepa lautele ma fa’apipi’i i se mea e iloa atu ai e tamaiti uma. “O i tatou uma ua sē i tatou pei o mamoe, ua ta’itasi ma fa’asaga i lona lava ala; a ua fa’ao ia te Ia e le Ali’i le amio leaga o i tatou uma.”

FESOASOANI MO LE MATAUPU:

Ua fa’aigoa le tatou Mataupu: O le Vaega o le Eseta – O le Maliu i le Satauro, ma le Aso Sa Laupama. E ta’u o le Vaega o le Eseta, ona e lē gata i le aso leni le mataupu, ae faaauau i le Aso Sa lea e lumana’i o le Aso Sa o le Eseta, po’o le Toetu. E ta’u fo’i o le Maliu i le Satauro, auā o le Aso Sa leni tatou te mafaufau ai ma talanoa i le maliu o Iesu i le Aso Faraile lea e lumana’i. E toe ta’u fo’i o le Aso Sa Laupama, auā o le igoa lena ua ave e tagata i le Aso Sa leni e muamua i luma o le Eseta.

O le Aso Sa leni e fa’amanatu ai le Malaga Fa’atupu a Iesu i Ierusalem. Na ti’eti’e ai i le asini ma afio atu i Ierusalem, ae alalaga tagata: “Osana, Osana i le Alo o Tavita. Ia manuia Lē afio mai i le Suafa o le Ali’i. Osana i mea aupitoaluga Ua o ane tagata ma lafo o latou ofu ma lau la’au i le ala e savali ai i luga le asini. Ua latou ave foi laupama i o latou lima ma lialiai, ma alalaga i lo latou tupu lea ua afio atu.

E le’i uma le vaiaso, o le Aso Faraile lava lena na toe alalaga ai le motu o tagata lava lea: **FA’ASATAURO! FA’ASATAURO! FA’ASATAURO** ia te Ia! Ona latou tu’itu’i lea o ona lima ma ona vae i fao, fa’atasi ma le la’au lea na ia amoina, ae tutu’i fa’atu i le elelee ina ia va’ai uma i ai tagata fegasoloa’i, ma a’amu ma faifai ia te Ia, se’i o’o ina maliu.

O se aso fa’anoanoa le Aso Faraile i le lalolagi kerisiano, ona ua maliu ma fa’asatauroina ai Iesu lo tatou Ali’i! Ae liua le fa’anoanoa i le fiafia tele, ona e o’o a’e i le isi Aso Sa, ua sui le alaga a tagata Toe fa’auau ai le tatou tala i le Aso Sa o lumana’i.

GAOIOIGA FA’ATINO:

Afai e te iloa fai se koluse mai ni launiu, ona avatu lea o ni launiu ta’ilua a le tamaitiiti, e fai ai sana koluse e fa’amanatu ai le Aso Sa Laupama, ma le mataupu o le Maliu i le Satauro.

FESILI:

- O a mea e tolu o lo’o fa’amanatu i le asō? (*Aso Sa Laupama, Aso Maliu, ma le Vaega o le Eseta*)
- O a upu na alalaga ai tagata i le aso leni? (*Osana i le Alo o Tavita. Ia manuia Le afio mai i le Suafa o le Ali’i. Osana i mea aupitoaluga*)
- Na fa’afefea ona maliu Iesu? (*Tutu’i fa’atasi ma le la’au, ae faatautau ai se’ia i’u ina to lana manava*)

A’OA’OGA:

Ae le’i tu’uina atu lona agaga, na alaga Iesu ma le leo tele: “*Lo’u Atua e, lo’u Atua e; se ā le mea ua e tu’ulafoa’i mai ai a’u?*” O le taimi lena na fa’ae’e atu ai uma agasala a le lalolagi i luga o Iesu. Ua pogisa le lagi i le taimi lea, auā ua aveeseina e le Atua lona Malamalama mai le lalolagi. O le malamalama o le Atua ma le pogisa o le agasala e lē mafai ona o fa’atasi. Ona toe alaga lea o Iesu, ma tu’uina atu lona agaga. Ua fasia le Tama’i Mamoe a le Atua. Fai mai le Tusi Paia: “*Ua fa’aalia mai e le Atua lona lava alofa ia te i tatou; ina ua maliu Keriso mo i tatou, a’o tatou agasala pea.*” Ai lava se tāua o tatou i le Atua; ina ua na fa’ataga Lona Atali’i e to’atasi ia oti, ina ia tatou ola ai.

PESE: #40 “*A ou manatu ifo nei.*”

ASO SA: MATI 31, 2024
MATAUPU: “VAEGA O LE ESETA – O LE TOETU (ASO SA O LE ESETA)”
TUSI FAITAU: Luka 24: 1-3
TAULOTO: Galuega 2:32 *O Iesu lava lena ua toe fa’atuina e le Atua; o molimau i matou uma i lena mea.”*

Sini: *Ia malamalama tamaiti e ogātotonu le toetu o Iesu Keriso i le fa’atuatuaga fa’a-kerisiano.*

FESOASOANI MO LE FAIA’OGA:

Toe faitau atoa e oe le faia’oga le tala o le Toetu i le Luka 24 i le taimi o lau tapenaga mo le lesona; ona ootoo lea e fa’apu’upu’u i tamaiti. Ae muamua ona fa’afeiloa’i tamaiti a’o gasolo mai, i le agaga fiafia (excited). E lelei le fa’aaoga upu ia e fa’afeiloa’i (greet) ai pe a ulufale mai: **Ua Toetu Iesu!** E tataua ona foliga fiafia tagata uma. Taumafai ia fa’apena le lagona i totonu o le potu a’oga, ae amata atu iā te oe le faia’oga. E lelei le tusi matatetele upu na i luga o le laupapa, ae sili ona lelei le taufai tautala uma ai.

UA TOETU IESU!

FESOASOANI MO LE MATAUPU:

Fa’amatala fa’apu’upu’u le taeao na o atu ai fafine i le tu’ugamau e ave teu fugala’au, a ua avanoa le tuugamau, ua toetu Iesu. Na’o le agelu na tu mai ia i latou ma fai mai upu nei: **E lē o iinei o Ia, ua toe tu!**

O nisi ituaiga talitonuga ma tapua’iga i atunu’u i fafo, e iai o latou atua ma tagata e ‘autu i ai a latou tapua’iga, ua feoti fo’i. Ae o’o mai nei e le’i toe ola mai se isi o na atua. A’o tatou la, e tapua’i iā Iesu lea na fa’asatauro ma maliu, na tanu fo’i, ae ua toe soifua mai. O lo’o afio i le lagi i le itu taumatau o le Atua le Tamā. O le mea lena e tulaga ese ai le tatou fa’atuatuaga. E tataua ona tatou fiafia uma ai ma tala’i atu i nisi e lē iloa ma lē talitonu.

Na fesili se faia’oga i se tasi teine la’itiiti pei o outou, pe matua atu fo’i – “*E te talitonu o soifua Iesu?*” Tali le teine: *Ioe*. Toe fesili le faia’oga – “*Fa’afefea ona e iloa ma fa’amaonia lena mea?*” Tali le tine: *Auā o lo’o soifua o Ia i totonu o lo’u loto!*”

Ae fa’afefea tatou? E te talitonu o soifua Iesu i lou loto? Afai e te lē mautinoa, E mafai ona e fesili i ai ma aioi i ai, e afio mai e nofo i totonu o lou loto. E fai o Ia mou Ali’i ma ou Fa’aola! Afai e moni au upu ma e talitonu ai, e moni fo’i le afio ifo o Iesu i lou loto ma mafuta ma oe.

GAOIOIGA FA’ATINO:

Nonofo fa’atali’oli’o tamaiti, po’o luga o le fola pe a iai ni fala. Ona fa’asolo lea o le fesili po’o le a se lagona e o’o iā te oe, pe a te’i ua toe ola mai se tagata o lou aiga, na oti? Sauni i uiga fa’aalia uma e ono o’o i ai: **fefe, lē mana’o e tupu se mea fa’apea, po’o le lē iloa se tali e fai**. Tata’i loa e oe i se lagona fiafia. “O Iesu le Ali’i alofa. A’o iai i le lalolagi, na fa’amalolō ma’i ma fa’amanuia tagata. Tou te lē manana’o e toe iai o Ia fa’atasi ma tatou, fa’apena? Mafaufau i mea lelei o le a tutupu iā tatou?”

FESILI:

- E fa’afefea ona iloa e le au so’o ua toe tu Iesu? (*Na ta’u mai e le agelu na i le tu’ugamau avanoa*).
- O fea o iai nei Iesu? (*I le lagi. O lo’o nofo i le itu taumatau o le Atua le Tamā ma fautua mo tatou*).
- Ae fa’afefea ona fai o Ia mo’u Fa’aola? (*E te fesili i ai, ma vala’aulia e afio mai i lou loto*).

A’OA’OGA:

O lo tatou fa’atuatuaga ma le talitonuga fa’a-kerisiano, e fa’avae i luga o Iesu Toetu! Tatou te fiafia, ina ua tatou iloa ua manumālo Iesu i le oti ma le tu’ugamau, o le manumālo fo’i lena o so’o se tagata talitonu i le agasala ma le tu’ugamau. O lona uiga, ua pule tatou e tete’e le agasala, e lē otometi ona tatou faia – ua iai le tatou filifiliga sa’oloto. O le tatou manumālo i le tu’ugamau, o lona uiga tatou te lē toe fefefe i le oti. E o’o mai lava le oti, ae o lona uiga tatou te oti i lalo nei, ae toetu a’e i le Ola Fa’avavau fa’atasi ma Iesu!

PESE: *Alive, Alive, Alive Forevermore. My Jesus is alive, alive forevermore”*

ASO SA: APERILA 07, 2024

MATAUPU: “ALOFA MONI – E ONOSA’I LE ALOFA”

TUSI FAITAU: I Korinito 13: 4-7

TAULOTO: I Korinito 13:4 “E onosa’i le alofa, e agamalū, e lē losilosī le alofa, e lē mitamitavale le alofa, e lē fa’afefeteina.”

Sini: Ia iloa e tamaiti o le alofa faale-Atua e faatalitali ma onosa’i se’ia fa’aalia mai ana faamanuiaga mo i tatou.

FESOASOANI MO LE FAIA’OGA:

O le a fa’aaogā pea le Tauloto leni i isi lesona e uiga fa’atasi, ma fuaiupu o lo’o aofia i le tusi faitau. E lelei pe amata nei ona fa’amasani e tauloto. E lelei fo’i pe a iai se tau (prize) mo le tagata e o’o atu i le lesona mulimuli o le vaega leni, ua maua uma fuaiupu e 4.

Tusi Faitau mo le tala: Kenese 29:1-30. E lelei le faitau uma muamua e lau susuga e sauni ai.

FESOASOANI MO LE MATAUPU:

Mata e fia ni itula e te sauni ai ma su’esu’e ina ia maua sou togi lelei i se su’ega? Mata e fia tausaga e toleni ai ma sauni se tagata ta’alo mo se ta’aloga (pei o le lakapī)? E iai nisi mea o le olaga leni e mana’omia ai lava le onosa’i. Ae afai e te faia mea na ona o le alofa, e lē faigata la. O le tatou tala i le asō e uiga i se tamaloa na matuā tele lava lona onosa’i ma lona alofa.

O Iakopo le igoa o le tagata. Na galue e tausī lafū manu a le tagata e igoa ia Lapana. Na mana’o Iakopo e fia fa’aipoipo i le afafine o Lapana e igoa ia Rasela. E fesili atu i lona tamā, ae fai mai Lapana: “*E te auauna mai ia te a’u i tausaga e 7, ona avatu lea o lo’u afafine e fai mau avā*”. Uma tausaga e fitu, fai le fa’aipoipoga, ae malama a’e le taeao, e le o Rasela na la fa’aipoipo, a’o lona uso o Lea. E fai atu Iakopo iā Lapana, ae fai mai: “*E tatau ona fa’aipoipo muamua Lea e matua. A e mana’o iā Rasela, ona e toe auauna mai lea i nisi tausaga e fitu*”. Oka se tele o tausaga, ae na **onosa’i** lava e Iakopo ma toe auauna i isi tausaga e fitu, ona o lona alofa iā Rasela. E tusa e 14 tausaga na auauna ai ma le **onosa’i** Iakopo, ona o lona alofa.

GAOIOIGA FA’ATINO:

Tufa ni pepa ma ni penitala i tamaiti, pe afai e iloa tusitusi; ma fa’asino/fa’atonu e tusi le fuaiupu:

E ONOSA’I LE ALOFA. A uma, ona fa’asolosolo mai lea i luga e faitau atu le fuaiupu ma ta’u atu sona manatu i le uiga o le fuaiupu ia te ia.

FESILI:

- O ai Lapana? (*O le tamā o le to’alua o Iakopo*).
- Aiseā na fa’aipoipo ai muamua Lea i lo Rasela? (*O le aganu’u, e faaipoipo muamua le ulumatua*).
- E fia tausaga na auauna ai Iakopo ona o le alofa iā Rasela? (*Fitu + fitu = 14 tausaga*).
- Aiseā na auauna ai ma onosa’i Iakopo mo Rasela? (*Ona o lona alofa iā Rasela*).

A’OA’OGA:

Ina ua fa’amalamalama e le aposetolo o Paulo uiga o le alofa i le aulotu i Korinito, o ana upu muamua lava fai mai: *E onosa’i le alofa*. E moni lelei. Auā a e mana’o tele i se mea lelei, e te onosa’i ma galue ma fa’atalitali mo lena mea. E onosa’i ma toleni fa’amaoni tagata ta’aalo mo tausaga e tele, ina ia aveā ma tagata ta’alo polōfesa. Pei o se mātua e a’oa’o ma a’oa’i ma le onosa’i le fanau, se’ia i’u ina matutua ma aveā ma tagata fa’amoemoeina. E fa’apena fo’i le tagata kerisiano moni, ua lagona le alofa iā Iesu, e ola ma le onosa’i ma le fa’atalitali mo le aso e fa’atasia ai ma lona Matai i le lagi. A’o ola onosa’i ma fa’atalitali, e mafuta ma Iesu i le tatalo ma faitau lana Afioaga i aso uma, ma tausisi i a’oa’oga na tu’uina mai e Iesu.

PESE: Fa’alogo ma Usita’i.

ASO SA: APERILA 14, 2024

MATAUPU: “ALOFA MONI – E AGAMALŪ LE ALOFA”

TUSI FAITAU: I Korinito 13: 4-7 (f.5)

TAULOTO: I Korinito 13:5 “*E lē amio matagā, e lē sa’ilia e ia ana lava mea, e lē fa’aitaitagofie, e lē faitau leaga ua tu’uina mai e nisi.*”

Sini: Ia iloa e tamaiti le moni o le alofa mai le Atua. Tatou te agalelei atu i so’o se tagata, ma fa’aalia la tatou amio agamalū i tagata uma lava; e o’o lava i ē ita mai ia i tatou.

FESOASOANI MO LE FAIA’OGA:

Ia tusi fa’amatatele i le laupapa le igoa o le lesona: ALOFA MONI – E AGAMALŪ LE ALOFA. Ia fa’amanatu tu le tauloto o le Aso Sa na te’a, ae fa’aopoopo atu loa i ai ma le fuaiupu 5 mo le asō. O le tala o le lesona e maua i le Luka 10:25-37.

FESOASOANI MO LE MATAUPU:

O le tatou lesona: **Alofa Moni – E Agamalū le Alofa**. A’o le tatou tala, o le fa’ataoto a Iesu i le Samaria Agalelei. O le Samaria o le atunu’u i le ogātotonu o le nu’u paia, e iai Isaraelu. E lē lelei le va o tagata Isaraelu ma Samaria. E lē fetautala’i pe a fetau; e lē fe’avea’ia fo’i a latou mea.

O lē tasi aso, sa iai le malaga le tasi tagata mai Ierusalemā e alu i Ieriko, ua maua e tagata faomea, ona fasi lea o ia ma ave ona ofu ma mea uma sa ia te ia. Ua tu’u ia i tafatafa o le auala, ua toeitiiti oti. Sa alu ane le ositaulaga ma va’ai i ai; ona ui lea o ia i le isi auala. Na ui ane fo’i le Sā Levī ma matamata i ia, ona alu fo’i lea o ia i le isi itu. Ae alu ane loa le tagata Samaria ma va’ai i ai, ona mutimutivale lea o lona alofa iā te ia. Ua alu atu liligi le u’u i ona manu’a ma fusifusi, ona fa’ati’eti’e lea i luga o lana manu, ae ta’ita’i e ia i le faletalimālo. Ua o’o i le taeao, ona fai lea o ia i le tagata pule i le faletalimālo, Le tupe lea e te tausia ai o ia nei. A iai se isi mea e toe faia mo ia, ou te totogia uma pe a ou toe foi mai.

Manatua o tagata nei o Iutaia ma Samaria, e lē fealofani, a’o lenei ua matuā **alofa** ma **agalelei, toe agamalū** lenei tagata ese i le Samaria ua manu’a. O le **alofa moni** lea o lo’o ta’ua i le tatou ulutala. E agalelei toe agamalū. E le’i fa’amasinosino ana mea ua alu, ae sa alofa fa’amaoni i le tagata ese.

GAOIOIGA FA’ATINO:

E lelei pe a lolomi ni ata o ni fu’a a mālo eseese; ia tofu le tamaitiiti ma sana fu’a. O le itu i tua o le fu’a e tusi ai le igoa o le atunu’u ma ona tagata. Ia tusi matatele i luga o le laupapa le ulutala: ALOFA MONI - E AGAMALŪ LE ALOFA. E fa’asolosolo tamaiti e ta’itasi ma ta’u mai le atunu’u o lana fu’a, ma po’o le a lona lagona i na tagata auā e lē masani ai. Mafaufau i le lesona o le asō.

FESILI:

- E fa’afefea ona fa’aali lou agamalū ma le agalelei i isi tagata? (*Eseese tali. Tu’u avanoa e tali mai*).
- Aiseā na tautala ai Iesu i le mea na faia e le tagata Samaria i lē na manu’a? (*Auā o le Iutaia o ia, a’o le Samaria lea ua agalelei atu i ai. E lē fealofani ma e lē feavea’ia ni a latou mea totino*).
- O le a le mea na fai e le ositaulaga ma le Sā Levī? (*Sa ui fa’atafatafa, e le’i fesoasoani i ai*).

A’OA’OGA:

Tatou te iloa e tāua lo tatou fealolofa’i ma agalelei le tasi i le isi. A’o le tala o le tatou lesona i le asō, ua tatou iloa ai e mana’o Iesu ia tatou alolofa ma agalelei i so’o tagata, e o’o lava i ē ita mai ia i tatou. O le alofa fa’apitoa lena, na’o le Atua e mafai ona aumaia ia i tatou. A’o ai le tagata lua te tuāoi? So’o se isi lava e ese mai ia tatou. E o’o fo’i i tagata agaleaga mai, o ē tatou te le masani pe aiga. O lou tuāoi e le na’o tagata tou te nonofo vāvālalata, ae o tagata ese tou te lē masani, so’ofale, a’ooga fa’atasi, sou aiga po’o sau uō. O Iesu na alofa lava i so’o se isi, e o’o lava i ē na fasiotia o ia. Afai e mafai e Iesu ona alofa i tagata na fasiotia o ia, a fa’afefea ona ou le mafaia?

PESE: *A’o Fua o le Agaga, e muamua le Alofa*

ASO SA: **APERILA 21, 2024**
MATAUPU: **“ALOFA MONI – E FA’AMAGALO LE ALOFA”**
TUSI FAITAU: **I Korinito 13: 4-7 (f.6)**
TAULOTO: **I Korinito 13:4** “E onosa’i le alofa, e agamalū, e lē losilosilosi le alofa, e lē mitamitavale le alofa, e lē fa’afefeteina, e lē amio matagā, e lē sa’ilia e ia ana lava mea, e lē fa’aitaitagofie, e lē faitau leaga ua tu’uina mai e nisi. ”

Sini: O le a iloa e tamaiti e ala i le tala iā Iosefa, ia filifili le alofa ma le fa’amagalo nai lo le tau ma sui.

FESOASOANI MO LE FAIA’OGA:

Toe fa’amanatu le tauloto o isi Aso Sa e lua ua te’a, fa’aopoopo i ai le fuaiupu 6 o le asō. Faitau le Kenese 37:12-28, o le lesona o le asō; o le tala i le fa’atauina o Iosefa e ona uso. Va’ai le Galuega Fa’atino, a faigofie ona tusi i se pepa ma lolomi ia tofua le tamaitiiti ma lana kopi.

FESOASOANI MO LE MATAUPU:

O le tatou tala, o le tamā e igoa iā Iakopo po’o Isaraelu, ma lana fanau tama e to’a 12. E le taumate na fefinaua’i le au uso i nisi aso, auā e to’atele i latou. Sa matuā alofa Iakopo i lona atali’i o Iosefa, e sili atu nai lo isi tama. Na ia faia fo’i se ofutalaloa felanulanua’i mo ia. E le’i fiafia ona uso matutua i lenei mea ma itagia ai Iosefa. O se tasi aso, na fa’amatala e Iosefa ana miti i ona uso: Ua ifo atu ona uso ma o latou mātua iā te ia. Na atili ai ona ita i latou iā Iosefa.

Sa leoleo mamoe ona uso i le vao, ona tuli lea e lona tamā Iosefa e alu e asi i latou ma aumai se tala. Ua va’ai mamao atu le au uso ua sau Ioesfa, ona latou taupulepule lea e fasioti iā te ia. Ae fai atu Reupena le uso mātua, ‘aua le fasiotia ae lafo i le lua sa i latou autafa. Na manatu Reupena e toe alu ane mulimuli e ava’e i luga Iosefa. E le’i leva, ae ui ane le aumalaga o tagata Mitiana e o e fa’atau a latou oloa i Aikupito. Ona taupulepule lea o le au uso, o le a fa’atau i ai Iosefa, ae aua le fasiotia. Ae aveese lona ofutalaloa, ma fasi se manu ae fufui i le toto o le manu. Ona ave lea ma fa’aali i lo latou tamā, ma fai i ai na latou maua le ofu, ae ai ua ‘aina o ia e se manu fe’ai. Sa matuā fa’anoanoa le toeaina o Iakopo ina ua lē toe fo’i mai lona atali’i o Iosefa. Sa manatu lava ia e moni le tala, ua ‘aina e se manu fe’ai i le ala. Sa nofo Iakopo i le ‘ie talatala ma le lefulefu ia so e tele, ona o lona fa’anoanoa i lona atali’i ua leai.

GALUEGA FA’ATINO:

Tusi le fa’atulagaga (chart) lea i luga o le laupapa, po’o se pepa malō lautele.

Igoa	O le a le mea na fai mai ia te oe na e ita ai pe fa’anoanoa
<u>La’u uō, Eli</u>	<u>Fa’amanumālo i le polo i taimi uma ma te ta’aalo ai.</u>
<u>Lo’u uso matua,</u>	<u>Tu’ua’i mai ia te a’u le ipu na ta’e</u>
<u>Lo’u tinā</u>	<u>Fa’asā a’u ona toe ‘aua’u i le sami</u>

Fai i ai e mafaufau i nisi na faia ni mea na tupu ai lona ita ma mana’o e tau ma sui i ai.

FESILI:

- Aiseā na ita ai uso o Iosefa ia te ia? (*O ana miti ua ifo atu ona mātua ma uso ia te ia?*)
- O le a le mea na fai e ona uso ina ua va’ai atu iā Iosefa? (*Fa’atau i le au malaga a Mitiana*).
- O le a le mea na fai e Iosefa i ona uso, ina ua o atu i Aikupito e fa’atau saito? (*Fa’amagalo*).

A’OA’OGA:

E sili le malosi o le alofa ma le loto fa’amagalo nai lo le ita ma le fia tau ma sui. A e iloa fa’amagalo, o le a atoatoa lou alofa. E ufiufi e le alofa agasala e tele, pei ona ufiufi ma fa’amagalo e le Atua a tatou agasala e tele i le toto o lona Alo o Iesu. E mafai fo’i ona tatou fa’amagalo atu nisi ua agaleaga mai I lenei vaiaso, faaali atu i se isi na sesē mai ia te oe, le faamagalo. E sa’oloto lou loto pe a e faamagalo atu.

PESE: 360 *Iesu e, o lou toto, ia ou magalo ai.*

ASO SA: APERILA 28, 2024
MATAUPU FA'AMANATU - LESONA 4-11:4-5) LAPATA'IGA MAI LE ATUA:
Mataala i le Matape'ape'a & Mataala i le Galo o le Atua.

A'ano o Mataupu:

O le matape'ape'a e fa'aleagaina ai lo tatou ola auauna i le Atua.
E faigofie ona galo le Atua pe a solo lelei ma manuia le olaga.

Fesili:

- E fia tupe na fa'alata ai e Iuta le Ali'i? (*30 tupe siliva*)
- Na fiafia Iuta i ana tupe na maua? (*Leai. Na i'u ina alu sisi lona ua*).
- O le a le mea e fai e tagata Isaraelu pe a a'ai ma mao'ona? (*Vivi'i i le Atua ma 'aua ne'i galo o Ia*)
- Aiseā na mana'o ai le Atua e 'aua ne'i fa'agalo Ia e Isaraelu? (*Ne'i mitamitavale ma fa'amauualuluga*)

6-8) VAEGA O LE ESETA: Fa'amanatuga Muamua, O le Maliu i le Satauro, & Toetu

A'ano o Mataupu:

- O Iesu le Tama'i Mamoe o le Paseka na fasia mo lo tatou fa'aolataga.
- O le uiga o le Fa'asatauroina ma le Maliu o Iesu i le Satauro mo lo tatou fa'aolataga.
- O le Toetu o Iesu Keriso le fa'atumutumuga o le fa'atuatuaga fa'a-kerisiano.

Fesili:

- O le a le Paseka sa fa'amanatu e tagata i aso o Iesu? (*Le po na sopoia ai fale o Isaraelu e le agelu o le oti i Aikupito, ina ua uma ona vali pou o latou fale i le toto*)
- Aiseā na ta'u ai Iesu o le Tama'i Mamoe a le Atua? (*Ona sa maligi lona toto e togiola ai tatou*).
- O a mea e tolu o lo'o fa'amanatu i le asō? (*Aso Sa Laupama, Aso Maliu, ma le Vaega o le Eseta*)
- Na fa'afefea ona maliu Iesu? (*Tutu'i fa'atasi i le la'au, fa'atautau ai se'ia i'u ina to lana mānava*).
- E fa'afefea ona iloa e le au so'o ua toe tu Iesu? (*Na ta'u mai e le agelu na i le tu'ugamau avanoa*).
- O fea o iai nei Iesu? (*I le lagi. O lo'o nofo i le itu taumatau o le Atua le Tamā ma fautua mo tatou*).

9-11) ALOFA MONI – E Onosa'i le Alofa, E Agamalū le alofa & E Fa'amagalo le Alofa.

A'ano o Mataupu:

- E onosa'i le alofa fa'ale-Atua, se'ia fa'aalia mai Ana fa'amanuiaga mo tatou.
- O le alofa moni fa'ale-Atua, e agamalū, onosa'i ma agalelei i so'o se tagata, e o'o lava i ē ita mai.
- Ia filifili le alofa ma le fa'amagalo nai lo le tau'i ma sui.

Fesili:

- Aiseā na fa'aipoipo ai muamua Lea i lo Rasela? (*O le aganu'u, e faaipoipo muamua le ulumatua*).
- E fia tausaga na auauna ai Iakopo ona o le alofa iā Rasela? (*Fitu + fitu = 14 tausaga*).
- Aiseā na auauna ai ma onosa'i Iakopo mo Rasela? (*Ona o lona alofa iā Rasela*).
- Aiseā na tautala ai Iesu i le mea na faia e le tagata Samaria i lē na manu'a? (*Auā o le Iutaia o ia, a'o le Samaria lea ua agalelei atu i ai. E lē fealofani ma e lē feavea'ia ni a latou mea totino*).
- O le a le mea na fai e le ositaulaga ma le Sā Levī? (*Sa ui fa'atafatafa, e le'i fesoasoani i ai*).
- Aiseā na ita ai uso o Iosefa ia te ia? (*O ana miti ua ifo atu ona mātua ma uso ia te ia?*)
- O le a le mea na fai e ona uso ina ua va'ai atu iā Iosefa? (*Fa'atau i le au malaga a Mitiana*).
- O le a le mea na fai e Iosefa i ona uso, ina ua o atu i Aikupito e fa'atau saito? (*Fa'amagalo*).

PESE: Fa'alogoma Usita'i.

Ia manuia lenei Aso Sa

ASO SA: ME 05, 2024
MATAUPU: “VAVEGA A IESU – FA’AMALŌLŌ LE TAGATA SUPA”
TUSI FAITAU: Mareko 2: 1-5, 11.
TAULOTO: Mareko 2:5b “...Lo’u atali’i e, ua fa’amagaloina au agasala.”

Sini: *Ia iloa e tamaiti, e sili atu le manatu o Iesu i le malolō o le agaga nai lo le tino .*

FESOASOANI MO LE FAIAOGA:

Afai na tofi se tamaitiiti e sauni mo le Tatalo Amata i le asō, ona tu’u loa lea i ai le avanoa. Ia iloa e tamaiti e tāua le Tatalo Amata. E ta’u atu ai o le a amata le lesona. O feiloa’iga, aoina o sene ma tauvala’auga, o nai gaioiga “fa’avevela” na. Ae fai loa le tatalo, ua tataua ona fa’alogo ma ua’i uma mai le faalogo i le lesona o le a fai. O le vala’aulia lea o le Agaga Paia e afio mai e pulea le taimi atoa. Tatalo mo le faia’oga ma le lesona. Talosia tamaiti e le’i o’o mai, nisi o mama’i, ma ē ua o’o mai ina ia aogā le lesona mo tagata uma.

O nisi tusi e fesoasoani i au su’esu’ega: Eperu 11:1, Mareko 2:1-12, Iakopo 2:16, Mataio 25:35-40

FESOASOANI MO LE MATAUPU:

1. Fa’amatala le tala i le supa ma ana uō, e pei ona tusia i le Mareko 2:1-12.
2. Ia pa’i i le fa’afitauli telē o le lē mafai ona ofi atu i le faitoto’a; na i’u ai ina o a’e i luga ma sosofa le taualuga ae tu’u tu’u ifo le latou uō iā Iesu.
3. Ia fa’amamafa le alolofa ma le fa’atuatua o uō a le tagata supa, na ala ai ona ave o ia iā Iesu.
4. O le ulua’i fetalaiga a Iesu, “Lo’u atali’i e, ua fa’amagaloina au agasala”. E le’i fa’amalolō muamua le tino, a’o le agaga. E sili atu ona tāua o tatou agaga i le Ali’i.
5. Aiseā na ita ai nisi na fa’alogo i ai, ma le ‘au tusiupu ina ua fetalai fa’apea Iesu? Ona sa manatu i latou e leai se isi e mafai ona fa’amagaloina agasala na’o le Atua.

GALUEGA FA’ATINO: Fa’aali ni ata o ni tagata mama’i, po’o nisi o momoe i luga o le auala, po’o se toaina/lo’omatua o amo sana avega, se isi o save’u se lapisi ma – fesili i le vasega po’o le fea o na tagata e mafai ona fai i ai se galuega alofa ma fesoasoani i ai. Tu’u le taimi e tali mai ai ma fa’amatala pe fa’afefea ona fa’ao’o sana fesoasoani i se na tagata.

FESILI:

- Aiseā na matuā tumu ai le fale lea na ave i ai le Supa? (*Ona ua faalogo tagata o lo’o iai Iesu i’inā*).
- O le a le mea na fai e uō a le tagata supa? (*Si’i le latou uō ma’i i luga o le fale, ma sosofa le taualuga ae tu’utu’u ifo lona moega i luma o Iesu*).
- O le a le mea muamua na fai e Iesu i le tagata supa? (*Fa’amagalo ana agasala*).
- Aiseā na ita ai le ‘au tusiupu ma ta’ita’i Iutaia iā Iesu? (*Fai mai latou na’o le Atua e mafai ona fa’amagalo agasala a se tagata*).

A’OA’OGA: E to’atele tatou e iai a tatou uō e tataua ona aumai iā Iesu. Atonu e le o mama’i o latou tino, a’o latou loto ma agaga. E iai fo’i ni fa’afitauli e faigata ai ona tatou ta’ita’i mai i latou i le lotu ma fa’aailoa i ai Iesu, ae le tataua ona ave ni mea e fa’alavelave ane e taofia ai le faia o le galuega aupito sili ona aogā–faailoa Iesu i au uō. Manatua, tigā ona faigata le sii o le Supa i luga o le fale, ae le’i fa’avaivai ai ana uō, ona o le moni o lo latou alofa; ma lo latou talitonu e mafai e Iesu ona fa’amalolō la latou uō.

PESE: “O A’ao agalelei o Iesu, e galue mo oe ma a’u”

Ia manuia lenei Aso Sa

ASO SA: ME 12, 2024

MATAUPU: “O LE VI’IGA A SE TINĀ – ASO SA O TINĀ”

TUSI FAITAU: Fa’ataoto 31:28

TAULOTO: Fa’ataoto 31:28 “*E tula’i mai lana fanau ma fa’afetai ia te ia, o lana tane fo’i ua vivi’i i ia te ia.*”

Sini: *Ia malamalama tamaiti i le tāua o le galuega a le tinā, ma e tataua ona fa’afetaia i latou.*

FESOASOANI MO LE FAIAOGA:

Nisi tusi e fesoasoani i lau su’esu’ega: I Samuelu 1:1-20, Ruta 4:13-17; II Timoteo 1:3-7.

E lē umi le lesona, ae fa’aogā tala i isi tinā ia e fa’alautele ai lau fa’amatalaga. E eseese uiga o lo’o tā’ua ai tinā uma ia. O Hana o lana tatalo fa’atauanau i le Atua mo sana tama. O Ruta o lona tau mai le Atua i le alofa fa’amaoni ma tausi i le tinā o lana tane ua oti, ma ua leai nisi suli o lona aiga. O Loi & Eunike o tinā o Timoteo na totōina le fatu o le fa’atuatua i lona loto, e le’i toe te’a ese ai e o’o ina matua ma aogā i le galuega tala’i a Paulo.

FESOASOANI MO LE MATAUPU:

I so’o se aiga, e iai lava le tagata e ana le matāfaioi o le tausi o le aiga i le itu tau tamāoaiga. E fa’amautinoa e iai le mea ‘ai a lona aiga i aso ta’itasi. E iai fo’i le tagata e tausia, fa’amamā. fafaga ma a’oa’o; le ituaiga a’oa’oga ma le tausiga na’o le tinā e mafai ona faia. O le tatou lesona i le asō, o le a tatou faitau ma fa’alogologo i se ituaiga tinā fa’apitoa, po’o le avā fo’i. E igoa o ia o le “Avā Amio Lelei”. A’o tatou fa’alogologo i ona uiga ma lana amio, tatou te iloa ai o se tinā tulaga ese lona tāua ma le sogasogā. Tatou te manatua ai fo’i o tatou lava tinā, ma lo latou fo’i galulue pea i le ao ma le po e fai le fatuaiga ma tausi i tatou. Faitau le Fa’ataoto 31:10-31. Ae le’i amataina le faitau, fai i tamaiti e fa’alogo lelei ma taumafai e pu’e pe maitau se uiga o lea tinā, e fa’amanatu atu ai ia te oe lou lava tinā.

GALUEGA FA’ATINO: Mate mai po’o le tinā o ai? (Faitau fuaiupu ia ma tu’u se taimi e tali mai ai).

1. Kenese 2: 21-23 (*Kaino, po’o Apelu, po’o Setu fo’i*)
2. Kenese 25: 21, 24 (*Esau & Iakopo*)
3. I Samuelu 1:10-11 (*Samuelu*)
4. Luka 1:11-14a (*Ioane le Papatiso*) ā i
5. Luka 2:4-7 (*Iesu*)

FESILI: .

- E fa’afefea ona e fa’amatalaina le tinā lea e ta’u i le lesona? (*E kuka, fai tagamea & auli, teufale...*)
- O a isi ana galuega e fai, e ese mai le tausiga o lona lava aiga? (*alofa i tagata matitiva*)
- O ai e fiafia ma mitamita i ona uiga? (*Lona to’alua ma lana fanau*)
- O le a se isi ona uiga tāua ma le maoa’e e ese mai le tausiga o lona aiga? (*Mata’u i le Atua*)

A’OA’OGA: O le tinā lea e tā’ua i le tusi faitau, o se tinā matuā auro lava lana amio, ae maua fo’i isi o ona uiga ma amio e nisi tinā. E fai fo’i e o tatou lava tinā nisi o matāfaioi o lo’o tā’ua ai le Tinā Amio Lelei lea. O tagata uma e tausia tatou, pei o le tinā o lou tinā, se uso o lou tinā pe tuafafine o lou tamā (aunty), sou uso matua po’o sou tuafafine matua, e mafai fo’i ona tatou va’ai fa’atinā i ai, ona o la latou galuega lagolago ma le alofa o lo’o faia mo tatou. Ae silisili i na mea uma, e tauia e le Atua ma fa’amanuia fafine ma tinā e amiotonu ma fa’atuatua ia te Ia. Ia tatou manatua e fa’aali o tatou loto fa’afetai iā i latou uma ua ta’ua o tatou tinā. Tatou te maua fo’i fa’amanuiaga a le Atua, i lo tatou āva i o tatou tinā.

PESE: “*Lo’u tinā, lo’u tinā; e pele pea oe i le agaga*”.

Ia Manuia tele le Aso Sa o Tina

ASO SA: ME 19, 2024

MATAUPU: “VAVEGA A IESU – FAGAINA LE LIMAGAAFE” (Penetekoso)

TUSI FAITAU: Mareko 6: 37-44

TAULOTO: Ioane 6:48 “O a’u o le Areto o le Ola”.

Sini: *Ia manatua e tamaiti, e mafai e Iesu ma mana’o o Ia e foa’i mai mea e tausi ai i tatou i le tino ma le itu fa’aleagaga. ‘Aua ne’i fa’ama’imauiina fa’amanuiaga ua foa’i mai e le Atua.*

FESOASOANI MO LE FAIAOGA:

Afai ua uma ona tofi le tamaitiiti e faia le Tatalo Amata, tu’u muamua le avanoa i le vasega pe iai se isi e i ai se mana’oga e mana’o e tatalo ai le vasega. Afai e leai, e lelei lava ona fa’amasani latou e iloa e mafai ona ‘auai uma i le tatalo, e ala i ni mana’oga pe ua’i mai ai fo’i a’o tatalo le isi tagata. Faitau uma fuaiupu e lau susuga e tapena ai.

FESOASOANI MO LE MATAUPU:

Fa’amatala. Ua vaivai ma fia a’ai Iesu ma ona so’o, o le mea lea na fetalai ai o Ia i ona so’o, latou te o i se mea tu’ufua na’o latou, atonu e maua ai se malologa; ae mulimuli atu pea lava le motu o tagata. Ua alofa Iesu i tagata ua pei o ni mamoe e leai se ta’ita’i, ma fa’aaui ai pea ana a’oa’oga. Ua silafia e Iesu lo latou fia a’ai i le tino ma le agaga fo’i. Ua o ane le au so’o ma fai atu ia te Ia, ia tu’u tagata e o e su’e ni a latou mea ‘ai, ae tali iai Iesu, e o latou e avane ni mea ‘ai ma tagata. Ua latou maua le tama e iai lana tāuga e 5 areto ma i’a e 2, ona latou ave lea iā Iesu. Ua fetalai atu Iesu i ona so’o, ia fa’atonu tagata e ta’ooto i vasega; e ta’i 100 ma le ta’i 50. Ua tago ia i areto ma i’a, ua tepa i le lagi ma fa’afetai, ona tofitofi ai lea ma avatu i le ‘au so’o e tufa i tagata. Ua a’ai ē uma na iai, ma mao’ona; ona ao lea e le ‘au so’o mea na totoe ua tutumu ai ato e 12.

GALUEGA FA’ATINO: Se ata o se vaipuna, ma se ata o se fa’aga’au e ta’i mai se paipa. O ni fa’atusa o ni ala e sapolai ai le suāvai e lē uma. **Muamua:** Fa’aali le ata o le vaipuna, ma fesili i le vasega po’o le a lona aogā, ae po’o le a fo’i le mea e maua mai ai. **Lona lua:** Fa’aali le ata o se fa’aga’au o lo’o ta’i mai le paipa, ma fai lava le fesili lea e tasi. O le a le eseese o vai ia, ma suāvai o lo’o i totonu o se ipu inu po’o se fagu? (**E i’u ina uma**).

FESILI:

- Aiseā na saga a’oa’o atu ai pea Iesu, ae le tu’u le motu o tagata e o e su’e ni a latou mea e ‘ai? (*Ona o le mutimutivale o lona alofa ia te i latou, ua pei o mamoe ua sē, ua leai so latou ta’ita’i*).
- O a mea ‘ai na maua e le ‘au so’o e fafaga ai tagata? (*5 areto ma i’a e lua*)
- O le a le mea na fai muamua e Iesu ae le’i tufaina mea ai? (*Tepa i le lagi ma tatalo fa’afetai*).
- E iai ni mea ‘ai na maumau? (*Leai. E 12 ato na tutumu i toe’aiga na ao e le ‘au so’o*).
- Na fafaga e Iesu tagata i le tino pe fa’aleagaga? (*Na fafaga fa’aleagaga muamua i le lauga atu o le Malo o le Atua, ona fafaga ai lea i le tino i areto ma i’a*).

A’OA’OGA: E fa’atusa fa’apea le mana o le Ali’i, le Galuega a le Agaga Paia o le Atua, e maua pea ma tafe mai pea e lē uma. Le mana lēna na tapa i ai Iesu ina ua tatalo, ona tofitofi ai lea o areto e lima ma i’u e lua, ma tu’u atu i ona so’o e fa’asoa i tagata e 5,000.

Afai e iai se mea ofoofogia o iā te oe, e te fiu e fa’aaogā ma tufa ae lē uma, mata e te nanāina, pe ta’u i nisi? E fa’apena le galuega a le Agaga Paia o le Atua, e te fiu e fa’asoa ona manuia ae le uma. E tataua ona tatou ta’u atu i nisi, ina ia latou fia o mai ai fo’i i le puna o le manuia, ma manuia ai.

PESE: “Lo’u Atua e, ua ou fia ‘ai ia e fafaga ia te a’u”

Ia manuia leni Aso Sa

ASO SA: ME 26, 2024

MATAUPU: MATAUPU FA'AMANATU - LESONA 14, 15, 16:14) VAVEGA A IESU – FA'AMALOLŌ LE TAGATA SUPA

Tauloto: Mareko 2:5b: “...Lo'u atali'i e, ua fa'amagaloina ai agasala.”

A'ano o le Mataupu: Ia iloa e tamaiti, e sili atu le manatu o Iesu i le malolō o le agaga nai lo le tino. Ole ala lea na fetalai muamua ai, “ua fa'amagaloina au agasala.” E telē le fa'afitauli na feagai ma uō a le Supa, ina ua taumafai e ulufale a ua le ofi le fale. E le'i taofia ai lo latou alolofa ma le talitonu e mafai e Iesu ona fa'amalolo la latou uō. O le ala lea na o ai i luga ma sosofa le tualuga o le fale.

Fesili:

- Aiseā na matuā tumu ai le fale lea na ave i ai le Supa?(*Ona ua faalogo tagata o lo'o iai Iesu i'inā*).
- O le a le mea na fai e uō a le tagata supa? (*Si'i le latou uō ma'i i luga o le fale, ma sosofa le tualuga ae tu'utu'u ifo lona moega i luma o Iesu*).
- O le a le mea muamua na fai e Iesu i le tagata supa? (*Fa'amagalo ana agasala*).
- Aiseā na ita ai le 'au tusiupu ma ta'ita'i Iutaia iā Iesu? (*Fai mai latou na'o le Atua e mafai ona fa'amagalo agasala a se tagata*).

15) O LE VI'IGA A SE TINĀ – ASO SA O TINĀ

Tauloto: Faataoto 31:28: “E tula'i mai lana fanau ma fa'afetai ia te ia, o lana tane fo'i ua vivi'i ia te ia.

A'ano o le Mataupu: Ia malamalama tamaiti i le tāua o le galuega a le tinā, ma e tataua ona fa'afetaia i latou. O le tinā lea e tā'ua i le tusi faitau, o se tinā matuā auro lana amio, ae maua fo'i isi o ona uiga ma amio e nisi tinā. E tutusa fo'i nisi ana matāfaii ma mea e fai e o tatou fo'i tinā. O tagata uma e tausia tatou, pei o le tinā o lou tinā, se uso o lou tinā pe tuafafine o lou tamā (aunty), sou uso matua po'o sou tuafafine matua, e mafai fo'i ona tatou va'ai fa'atinā i ai, ona o la latou galuega lagolago ma le alofa o lo'o faia mo tatou. Ae silisili i na mea uma, e tauia e le Atua ma fa'amanuia fafine ma tinā e amiotonu ma fa'atuatua ia te Ia. Ia tatou manatua e fa'aali o tatou loto fa'afetai iā i latou uma ua ta'ua o tatou tinā. Tatou te maua fo'i fa'amanuiaga a le Atua, i lo tatou āva i o tatou tinā.

- Fesili:**
- E fa'afefea ona e fa'amatalaina le tinā lele lea? (*E kuka, fai tagamea & auli, teufale...*)
 - O a isi ana galuega e fai, e ese mai le tausiga o lona lava aiga? (*alofa i tagata matitiva*)
 - O ai e fiafia ma mitamita i ona uiga? (*Lona to'alua ma lana fanau*)
 - O le a se isi ona uiga tāua e ese mai le tausiga o lona aiga? (*Mata'u i le Atua*)

16) VAVEGA A IESU – FAGAINA O LE LIMAGAAFE (Penetekoso)

Tauloto: Ioane 6:48 “O A'u o le Areto o le Ola.”

A'ano o le Mataupu: Ia manatua e tamaiti, e mafai ma e Iesu ma mana'o o Ia e foa'i mai mea e tausai ai i tatou i le tino ma le itu fa'aleagaga. 'Aua ne'i fa'ama'imauiina fa'amanuiaga ua foa'i mai e le Atua. E fa'atusa fa'apea le mana o le Ali'i, le Galuega a le Agaga Paia o le Atua, e maua pea ma tafe mai pea e lē uma. Le mana lena na tapa i ai Iesu ina ua tatalo, ona tofitofi ai lea o areto e lima ma i'u e lua, ma tu'u atu i ona so'o e fa'asoa i tagata e 5,000.

Afai e iai se mea ofoofogia o iā te oe, e te fiu e fa'aaogā ma tufa ae lē uma, mata e te nanāina, pe ta'u i nisi? E fa'apena le galuega a le Agaga Paia o le Atua, e te fiu e fa'asoa ona manuia ae le uma. E tataua ona tatou ta'u atu i nisi, ina ia latou fia o mai ai fo'i i le puna o le manuia, ma manuia ai.

FESILI:

- Aiseā na saga a'oa'o atu ai pea Iesu, ae le tu'u le motu o tagata e o e su'e ni a latou mea e 'ai? (*Ona o le mutimutivale o lona alofa ia te i latou, ua pei o mamoe ua sē, ua leai so latou ta'ita'i*).
- O a mea 'ai na maua e le 'au so'o e fafaga ai tagata? (*5 areto ma i'a e lua*)

- O le a le mea na fai muamua e Iesu ae le'i tufaina mea ai? (*Tepa i le lagi ma tatalo fa'afetai*).
- E iai ni mea 'ai na maumau? (*Leai. E 12 ato na tutumu i toe'aiga na ao e le 'au so'o*).
- Na fafaga e Iesu tagata i le tino pe fa'aleagaga? (*Fa'aleagaga muamua, ma le tino i areto ma i'a*).

PESE: *Fa'alogo ma Usita'i.*

ASO SA: IUNI 02, 2024

MATAUPU: “VAVEGA A IESU – FA'AMALOLŌ LEPELA E TO'ASEFULU”

TUSI FAITAU: Luka 17: 11-19

TAULOTO: Salamo 100:4 “*Ia outou ulu atu i ona faitoto'a ma le vi'iga, ma ona lotoā ma le pese*”

Sini: *Ia malamalama tamaiti i le tāua o le vivi'i i le Atua ma le loto fa'afetai, pe a talia sau tatalo, pe manuia fo'i se fa'amoemoe e tu'u atu ia te Ia.*

FESOASOANI MO LE FAIAOGA:

A mafai ona fa'atino le ata pu'upu'u i lalo, e fesoasoani tele i le fa'apupulaina o lenei lesona aogā.

FESOASOANI MO LE MATAUPU:

Amata le lesona i se fesili, Ta'u mai ni vavega po'o ni fa'amalolōga latou te manatua mai isi lesona ua te'a. O le lesona o le asō e fa'aalia ai le paoa/manua o le fa'atuatua; ae matuā fa'amamafa ai le tāua o le agaga fa'afetai. E to'asefulu lepele na tutū mamao atu, a'o savali ane Iesu. E to'aiva latou o Iutaia, ae to'atasi le Samaria. Na fa'atonu e Iesu lepele e o e fa'aali latou i le 'au ositaulaga, o lona uiga ua mamā. Na usita'i lepele ma o loa. E va'ava'ai ifo i o latou tino, ua te'a ese le ma'i, ae na'o le to'atasi na toe fo'i ane e fa'afetai iā Iesu. E fa'apa'ū le lepele i a'ao o Iesu ma fa'afetai, ae fetalai Iesu: E le to'asefulu outou na fa'amalolō, a'o fea le to'aiva? E lē iloa toe fo'i mai e vivi'i i le Atua? E tāua le fa'afo'i o le faafetai i lē na mafua ai lou manuia, ae sili ona tāua o lou vivii i le Atua, o le pogai o fa'amanuiaga uma.

ATA FA'ATINO: (*Savalivali ane Iesu i le ala*)

Lepela 1: (*fa'asino iā Iesu ma tautala i isi lepele e to'aiva*) *Va'ai ia Iesu! Ou te iloa na te mafaia ona fa'amamā tatou. Tutū uma i luga ma tatou vala'au fa'atasi i ai.*

Lepela 1: *Le Ali'i e, Iesu. Alofa mai ia te i matou. (vala'au fa'atasi atu ma isi) Iesu e, alofa mai ia te i matou.*

Iesu: (*tu ma va'ai mai i lepele mo sina taimi*) *O loa. Fa'aali outou i le au ositaulaga.*

Lepela uma: (*Tautalatala fiafia. Va'ai ifo i o latou tino, ua mamā. Tamomo'e ese ma le fiafia.*)

Lepela 1: (*Tu, ua lē tamo'e. Va'ai i ona lima ma iloilo lona tino ua mamā. Liliu i tua ma savali vave iā Iesu*) *Fa'afetai. Fa'afetai, le Ali'i e. Ua ou malolō! Fa'afetai. Fa'afetai.*

Iesu: *E lē to'asefulu outou na fa'amamāina, a'o fea le isi to'aiva? E leai se isi e toe fia fo'i e ave le fa'afetai i le Atua, ua na'o lenei tagata nu'u ese? Tu ia i luga inā alu. Ua e ola i lou fa'atuatua.*

Lepela 1: (*Tu i luga ma ataata. Sisi'i lima*). *O Iesu la'u Foma'i. O Iesu lo'u Ali'i!*

A'OA'OGA: E iai ni vavega na tā'ua i le amataga na fa'aalia ai le agaga vivi'i po'o le loto fa'afetai o ē na a'afia ai? E tāua le fa'afo'i o le fa'afetai pe a manuia se taumafaiga, pe fai e se isi se mea lelei mo oe, e ta'u atu ai e te iloa lē na mafua ai le manuia, e le o oe. E ui o oe na taumafai, ae o lou fa'alagolago i le pogai o le malosi na mafua ai. Po'o a lava la taumafaiga eseese, o le Atua lava le pogai o le taunu'uga manuia, ma e ao ina fa'afo'i le fa'afetai ia te Ia. E o fa'atasi le agaga fa'afetai ma le vivi'i. O le vi'iga e ave i le Atua, na'o ia lava. E mafai ona e fa'afetai i se tagata na fesoasoani ane, a'o le vi'iga e ave sa'o i le Atua. E fa'amanatu mai ai fo'i ia i tatou, o le Atua tatou te mafai ai so'o se mea, pe a tatou fa'atuatua ia te Ia. O Ia le taula'iga ma le taunu'uga o so'o se fa'amoemoe.

FESILI:

- Aiseā na tutū mamao atu ai lepele? (*E sa ona latalata i tagata ona e ta'ua latou e lē mamā*)

- Na vala’au lepela: Iesu e, alofa mai ia te i matou. E iai se taimi na e lagona ai sou fia vala’au i le Ali’i mo se fesoasoani? *(Tu’u le avanoa e tali mai ai)*
- Aiseā na malolō lepela, ae le’i pa’i i ai Iesu? *(E iai le mana o Iesu e mafai malolō i sana fetalaiga. Na usita’i fo’i lepela ma o, o lona uiga na talitonu i le Ali’i lea na vala’au i ai).*

PESE: “O Ia o le Atua fai vavega”.

Ia manuia lenei Aso Sa

ASO SA: IUNI 09, 2024
MATAUPU: “VAVEGA A IESU – UA VAVAO E IESU LE MATAGI”
TUSI FAITAU: Mareko 4:35-41
TAULOTO: Salamo 89:9 “O oe lava e te pule i le sami, a sousou ona peau, o oe e laolao ai.”

Sini: *E iloa e tamaiti i lenei lesona, o Iesu e iai le pule aoao i mea uma. E leai se mea na te lē mafaia..*

FESOASOANI MO LE FAIAOGA:

Ia faitau fa’atasi le tauloto, ia fa’atele ni taimi. Fa’amalamalama ma fa’amanatu i tamaiti, o Iesu e pule aoao i mea uma o le foafoaga. O Ia e ona mea uma. Nisi tusi e fesoasoani: Mataio 28:18, Mataio 11:27. Efeso 1:21, Kolose 2:10.

FESOASOANI MO LE MATAUPU:

Ia fa’amanino i tamaiti, e lē na’o matagi e agi e ta’u o afā; ae mafai fo’i ona ta’u fa’alavelave ma mea faigata e tutupu i o tatou olaga, o afā. Po’o le a lava le ituaiga afā, e mafai e Iesu ona fa’amalū, auā o Ia e iai le pule i mea uma na faia.

O le tasi aso, ua uma ona a’oa’o Iesu i le motu o tagata, ona fai atu lea i ona so’o, Ia latou o atu i le isi itu o le vai. Atonu ua vaivai le Ali’i, ma ua fia malolō. Ua mana’omia fo’i se taimi na’o latou e aunoa ma ni tagata e lolofi ane. Ua i totonu o le va’a i latou, ona to mai lea o le afā tele. Ua oso mai le peau ma le sami i totonu o le va’a, ua toeitiiti goto. Ua fefefe le au so’o, a’o Iesu o lo’o tofā o ia i le taumuli o le va’a. Ua latou fafagu ia te ia ma fai atu: “E te lē manatu mai ea ia te i matou a fano?” Ua ala o ia, ona vavao atu lea i le matagi: “Inā malū ia.” Ona pe ai lea o le matagi, ua le toe sou fo’i le sami. Ua ofo le au so’o ma fa’apea ifo: “O ai lenei, ua usita’i i ai le matagi ma le vai?” Ua fetalai atu Iesu ia i latou, “Se a le mea tou te fefefe ai fa’apea, ae tou te le fa’atuatua mai ia te a’u?”

GAOIOIGA FA’ATINO:

Mafaufau i ni taimi na e matuā fefe ai lava. O le a lau mea na fai? Na e tagi, e’ē, lafi, fa’apupu’u i se pa’usisi, po’o le a lava? Tusi i lalo taimi na. Ona mafaufau lea i le lesona o le aso lenei ma lona a’oa’oga. Toe tauloto le fuaiupu Salamo 89:9, fai ma au fuaiupu tauave. Ia e taumafai e fa’amanatu ia te oe lava, so’o se taimi e o’o mai ai le fefe – o le a e vala’au i le Ali’i e pei ona fai e le au so’o i le lesona o le asō.

A’OA’OGA:

Ia malamalama tamaiti o Iesu e to’afilemu ai so’o se afā i le natura, po’o afā fo’i o le olaga o le tagata lava ia. E leai se mea e lē mafaia e le Ali’i. A tatou fa’atuatua ia te Ia, o lona mana lena e fesoasoani mai fo’i ia i tatou pe a tatou ole atu ia te Ia. Sa ia fa’amalūina le afā ina ua ole i ai le au so’o, e fa’apena fo’i tatou pe a tatou ole atu ma le fa’atuatua.

FESILI:

- O fea na iai Iesu a’o agi le afā? *(Sa tofā / moe i le taumuli o le va’a.*
- Na fa’afefea ona fa’amalū e Iesu le afā? *(Na tautala i ai. E iai lona mana, e pule fo’i Ia i mea uma).*
- Aiseā na fefefe ai le au so’o? *(Na va’ai i le malosi o le afā. E le’i va’ai muamua ua vavao e Iesu le matagi).*
- E fa’afefea ona feagai ma afā o lo tatou olaga? *(Tu’u le avanoa e tali mai ai – Vala’au ma le fa’atuatua ia Iesu.)*

PESE: “O Keriso i lo’u va’a, ou te ata’ata i le afā.” - With Christ in my vessel I will smile at the storm.

Ia manuia lenei Aso Sa.

ASO SA: IUNI 16, 2024

MATAUPU: “IA OUTOU Ō, MA FA’APEA ONA FAI” - ASO SA O TAMĀ

TUSI FAITAU: Ioane 14: 15-16

TAULOTO: Ioane 14:15 “Afai tou te alofa mai ia te a’u, ia outou tausi mai i a’u poloa’iga.”

Sini: *I le lesona lenei, o le a iloa e tamaiti le tāua o le tausisi i au upu ma mulimuli ai. Usita’i tusa pe te lagona lou lē fia faia.*

FESOASOANI MO LE FAIAOGA:

O nisi tusi e lagolago i lau suesu’ega ma ou manatu: Faataoto 6:9-11, Fa’ataoto 10:4-5, Mataio 21:28-30. O le fesili e tata’i i ai manatu mo le lesona, aemaise le Aso Sa o Tamā. O ā gaoioiga fa’apitoa e mafai ona e faia ina ia maua ai se Aso Sa o Tamā tulaga ese ma le fiafia mo lou tamā, le tamā o lou tamā, po’o nisi lava e te fa’atamā i ai? E iai ni feau e masani ona fai e lou tamā e mafai ona e faia, ae malolō ia? Po’o se mea e momo’o i ai lona loto e mafai ona e faia e fa’afiafia ai si ou tamā?

FESOASOANI MO LE MATAUPU:

Faitau: Mataio 21:28-30. So’o se taimi tatou te faitau ai i le Tusi Paia, le Upu a le Atua, tatou iloa e moni tala o lo’o i ai. O nisi taimi, e fa’aaogā e Iesu ni tala mai le Tusi Paia e fai ai sana a’oa’oga i ona so’o ma ē na lolofi atu e fa’alogologo ia te Ia. O nei tala e uiga i ni mea e tutupu i o tatou olaga i aso fai so’o, ae ese le tāua pe a tatou fa’atusatusaina i lo tatou malamalamaga o le Atua. E finagalo le Atua ia tatou faitau, fa’alogo, ma a’oa’oina mai mea e tutupu i nei tala, ina ia tatou fa’apei o Iesu. A tatou fa’alogo ma mulimuli i a’oa’oga a le Atua, e ta’u le mea lena o le usita’i. E lē na’o le faitau ma fa’alogologo i feau o lo’o tusia mai le Tusi Paia, ae silisili lo tatou ō e fa’ataunu’u mea o lo’o fa’atonuina mai tatou te faia. E lē na ona tatou tautatala ai, ae tāua lo tatou fa’atino o mea ia o lo’o fai mai e fai. O le usita’i lena.

E eseese tali a le fanau a lē ona le tovine, ina ua fesili i ai lo la tamā mo se fesoasoani e galulue i le tovine. O le isi na ioe e alu, ae le’i tausi i lana ioe. O le isi na lē fia alu, ae mulimuli ane ua sui lona mafaufau ma i’u ina alu galue se’ia mae’a le galuega.

GAOIOIGA FA’ATINO:

Tusi i lalo (pe ta’u mai fo’i pe a lē iloa tusitusi) ni auala o le a fesoasoani ai i lona tamā ia maua ai se vaiaso fiafia o le Aso Sa o Tamā. E le tau faia ni meaalofa taugata e fa’atau mai faleoloa, a’o ni mea e fesoasoani ai: Fufulu le ta’avale, Fa’amamā se’evae faigaluega, Teu lelei meafaigaluega i le pusa e teu ai, tali lana vala’au i taimi uma e vala’au atu ai, ma alu e fai le feau lea e mana’omia.

A’OA’OGA:

E leai se aogā o upu tatou te tautatala ai, pe afai e lē mulimuli atu ai le fa’atinoga. E tataua ona tatou ō e fa’ataunu’u mea ua a’oa’oina ai tatou mai le Upu a le Atua. O le a’oa’oga a Iesu, e tāua le fa’atino ma fai ia mae’a le galuega. Ia tatou usita’i i o tatou mātua ma fa’atino a tatou upu i mea e fiafia ma manuia ai le Aso Sa o Tamā, ae vi’ia ai le Atua. A tatou usita’i i o tamā ma fai e pei ona fa’atonu mai, e le gata ina fiafia o ia, ae sili ai fo’i ona fiafia lo tatou Tamā o i le lagi o lo’o silasila ifo i a tatou mea e fai.

FESILI:

- O le a le tali a le atali’i ulumatua i lona tamā/ (E lē alu i le tovine)
- Ae a le tali a le isi atali’i? (Fai mai o le a alu, ae le’i alu lava).
- O fea na i’u i ai tama e lua? (Na toe sui le mafaufau o le tama matua ma alu i le tovine a’o le atali’i lona lua e le’i alu lava.)
- O le a le a’oa’oga o lo’o aumaia e Iesu i nei atali’i e to’alua? (E leo tele galuega i lo upu).

PESE: “O lima galue ma vae momo’e, meaalofa a le Atua mo a’u ma oe.

ASO SA: IUNI 23, 2024
MATAUPU: “FILIPĪ – O LO’U OLA UA IĀ KERISO LEA”
TUSI FAITAU: **Filipi 1:21; Kalatia 2:20**
TAULOTO: **Filipi 1:21** “Auā o lo’u ola ua iā Keriso lea, a’o lo’u oti o lo’u manuia lea.”

Sini: Ia a’oa’oina tamaiti e alolofa i so’o se tagata e pei ona faia e Paulo, ma fa’amalosi iai ia ola fiafia mo Keriso i so’o se mea e feagai ai i lenei olaga.

FESOASOANI MO LE FAIAOGA:

O le a tatou talanoaina le aposetolo o Paulo ma faigata na o’o i lona “ola mo Keriso”. Ia malamalama tamaiti, e lē fa’apea a falepuipui se tagata o lona uiga ua leai se fa’amoemoe. Tusa pe i’u i le oti le falepuipui o le kerisiano, e manuia lava auā ua na maua Keriso. Faitau le Kalatia 2:20.

FA’ASOA I LE MATAUPU:

O le a tatou a’oa’oina nisi mea aogā o le olaga mai le Tusi o Filipi. O le tusi a Paulo na tusi a’o iai i le falepuipui. Na lafo Paulo i le falepuipui, ona o le lē fiafia o ta’ita’i Iutaia ma Roma i lana tala’iga o Iesu. O le isi igoa o Paulo, o le “Aposetolo o Nu’u Ese”. E mafua lena ona sa lauga atu ma tala’i solo i so’o se atunu’u e mafai ona o’o i ai, tusa pe lē fia fa’alogo i ai tagata ma itagia ai.

Sa tusi lana tusi i tagata kerisiano i Filipi, o ē na alolofa pea iā te ia ma taumafai e fa’ao’o atu fesoasoani iā te ia i totonu o le falepuipui. O le tusi fa’amalosi. Peisea’i e fai atu, “aua le popole mai, o lo’o manuia lava a’u.” Tusa pe loka ma saisaitia, ae le afaina, auā o lona ola ua tu’uina atu e pule ai Keriso. Afai fo’i e i’u ina oti ai ia i totonu o le falepuipui, e lē afaina; auā o lona oti o lona manuia lena. E fa’afefea ona manuia se tagata pe a oti? E manuia auā o le a alu e feiloa’i ma Iesu lea sa auauna iai ma tala’i i lalo nei. E manuia la le tagata e oti, a ua iai Iesu i lona loto. O le a’ano lena o le tala’iga a Paulo.

GAOIOIGA FA’ATINO:

Afai o falepuipuiina oe, o ai e te mana’o e ave iai sau tusi? A’o a fo’i au tala e fai i lena tagata? O le tusi lenei o Filipi, o le tusi a Paulo na tusia a’o i le falepuipui.

E lelei pe a sa’ili ni igoa o nisi o i le falepuipui, e mafai ona ave iai ni nai feau fa’amalosi mai le vasega, pe a uma lenei lesona. Ta’u iai le alofa o Iesu ma le fa’amoemoe e maua pea iā Keriso.

A'OA'OGA:

E maua le fiafia ma le manuia e le tagata ua iai Keriso i lona ola. Lea e ta'u e nisi, o le "fa'aolaina". O le fa'aolaina lena fa'aleagaga. E mafai ona fiafia le tagata e "ola mo Keriso", tusa pe feagai ma faigata o le olaga, pei o le afatia na feagai ma Paulo, toe lamatia i lima o tagata lē fiafia i lana tala'iga. Ae lagona le fiafia loloto pe a e iloa ua e faia se mea lelei e te auauna ai mo Keriso. E lē na ona maua mai Keriso e manuia ai lou ola, ae mafai fo'i ona e faia ni galuega lelei ma fesoasoani i nisi auā o uiga na e atagia ai Keriso i lou olaga. O le "ola mo Keriso" lena, lea e fai mai ai Paulo, "O lo'u ola ua iā Keriso lea". Tusa po'o le a le mea e o'o mai; afai o le oti ona o le auauna iā Keriso, fai mai Paulo – O lona manuia lena!

FESILI:

- O ai na tusi le tusi o Filipi? *(O Paulo)*
- Na fa'afefea ona o'o Paulo i le falepuipui? *(Na lafo iai e ta'ita'i Roma sa lē fiafia i lana tala'iga).*
- Mata sa faigata ia Paulo ona fa'amalosi i nisi a'o falepuipui? *(Leai. E le'i taofia e faitoto'a u'amea o le falepuipui lana tala'iga. Ua le mafai ona fa'atino e ia lava, ona fa'aaogā lea o laupepa e tusi ai).*
- Aiseā na fiafia ai Paulo a'o saisaitia? *(Auā pau lana agasala, o le tala'iga o Keriso ma lona alofa. E lē fefe e ta'u le Suafa o Iesu, auā o lana uō; o lo'o nofo ma soifua i totonu o lona loto).*

PESE: "Lo'u Atua e, o a'u lenei. E ofo atu lo'u ola mo oe Iesu."

ASO SA – Iuni 30, 2024

MATAUPU: Suega Fa'ai'u.

SINI: Ia a'oa'oina le fanau ina ia mafai ona latou manatua le tele o tala, ma ia latou tauloto ni igoa o tagata ma ni mau-auloto mai le Tusi Pa'ia.

FESOASOANI MO LE FAIAOGA: Malo le fa'amalolosi fa'afetai fo'i le onosa'i i lavasiga sa feagai ai o lenei vaiseuga o la tatou folauga o lenei Tausaga 2024. Ia fa'amalosi pea o outou loto e fiafia e galulue i lenei galuega o le Faiaoga Aso Sa. Ma ia outou mautinoa e le tuulafoaina lava so outou tau mai le Atua o lē ana le galuega. Ia augofie pea lagona e faitau ma su'esu'e i le Tusi Paia, ina ia faaosofia pea lagona ma le agaga e tautua i le Atua e ala i lenei galuega ua valaauina ai lo outou soifua ma lo tatou ola.

Ua na o se toe faamanatu o ni **fesili** mai Lesona ua ma'ea ona iloa e fanau, ae ua tuuina atu i a outou susuga i Faiaoga, ni nai fesili ina ia faatino ai le **Su'ega Faai'u** mo nai fanau ma ia latou maua pea le fiafia e auai mai i le aoga Aso Sa.

Ia manuia tele le feagai ai o nai Fanau ma malologa o lenei afa tausaga.. Ia manuia foi le feagai ai o a outou susuga ma malologa o lenei vaiseuga o le Tausaga 2024. Ia ia te outou manuia o le Atua ma nai Fanau e faavavau. Amene.

Fesili:

- Aiseā na matuā tumu ai le fale lea na ave i ai le Supa?
(Ona ua faalogo tagata o lo'o iai Iesu i'inā).
- O le a le mea na fai e uō a le tagata supa?
(Si'i le latou uō ma'i i luga o le fale, ma sosofa le taualuga ae tu'utu'u ifo lona moega i luma o Iesu).
- O le a le mea muamua na fai e Iesu i le tagata supa?
(Fa'amagalo ana agasala).
- Aiseā na ita ai le 'au tusiupu ma ta'ita'i Iutaia iā Iesu?
(Fai mai latou na'o le Atua e mafai ona fa'amagalo agasala a se tagata).
- E fa'afefea ona e fa'amatalaina le tinā lele lea?
(E kuka, fai tagamea & auli, teufale....)
- O a isi ana galuega e fai, e ese mai le tausiga o lona lava aiga?
(alofa i tagata matitiva)
- O ai e fiafia ma mitamita i ona uiga?
(Lona to'alua ma lana fanau)
- O le a se isi ona uiga tāua e ese mai le tausiga o lona aiga?
(Mata'u i le Atua)
- Aiseā na saga a'oa'o atu ai pea Iesu, ae le tu'u le motu o tagata e o e su'e ni a latou mea e 'ai?
(Ona o le mutimutivale o lona alofa ia te i latou, ua pei o mamoe ua sē, ua leai so latou ta'ita'i).
- O a mea 'ai na maua e le 'au so'o e fafaga ai tagata?
(5 areto ma i'a e lua)
- O le a le mea na fai muamua e Iesu ae le'i tufaina mea ai?
(Tepa i le lagi ma tatalo fa'afetai).
- E iai ni mea 'ai na maumau?
(Leai. E 12 ato na tutumu i toe'aiga na ao e le 'au so'o).
- Na fafaga e Iesu tagata i le tino pe fa'aleagaga?
(Fa'aleagaga muamua, ma le tino i areto ma i'a).

PESE: Fa'alogi ma Usita'i.